



日講四書解義

孟子



卷二十一
之二十四

PL
2463
Z6J5
1677a
v. 7



Digitized by the Internet Archive
in 2021 with funding from
University of Toronto

日講四書解義卷之二十一

孟子

下之三

萬章章句上

萬章問曰。舜往于田。號泣于旻天。何爲其號泣也。孟子曰。怨慕也。萬章曰。父母愛之。喜而不忘。父母惡之。勞而不怨。然則舜怨乎。曰。長息問於公明高曰。舜往于田。則吾旣得聞命矣。號泣于旻天。于父母。則吾不知也。公明高曰。是非爾所知也。夫公明高以孝子之心爲不若是忍。我竭



力耕田。共爲子職而已矣。父母之不我愛。於我何哉。

此一章書。見舜怨慕之大孝也。萬章問曰。嘗聞舜之事親。往耕於歷山之田。每號呼仁覆閔下之旻天而哀泣。不知舜處父母之間。何爲若是其號泣也。孟子曰。舜之號泣。乃激於至情之不容已。戚戚然若有所歉而怨。且皇皇然若有所求而慕也。萬章未喻怨慕之旨。又問曰。吾聞人子事親時。得於親而父母愛。

之也。固中心喜之而不敢有忘。卽不得於親而父母惡之也。雖捶楚加之而不敢有怨。今曰怨慕。則舜亦怨其親乎。孟子曰。怨慕非怨親之謂也。子以怨親疑舜。其亦長息之見乎。昔公明高之弟子長息問於公明高曰。舜往于田。是躬耕以養親也。則吾旣得聞教命而知之矣。若其號呼旻天。又號呼父母而哀泣不已。則吾不知其何心也。公明高答之曰。孝莫大於虞舜。其號泣若是。用心有獨苦者。非

爾常情之所能知也。吾推公明高之意。蓋以
舜之心。孝子之心也。孝子於親。本有不可解
之天性。一當其變。自有不容已之至情。若忽
然無愁。薄亦甚矣。孝子之心。豈若是乎。舜之
心。果何如。其心以爲我竭力耕田。不過子職
中之一事而已矣。孝聚百順。其他虧缺甚多。
今父母之不愛我。不知我之所以得罪者。果
何在哉。求之而不得其故。此所以呼旻天呼
父母而哀泣也。我所謂怨慕者。怨已之不得

乎親而思慕耳。豈怨父母哉。按孟子所言。怨慕卽書經所言負罪引慝。夔夔齋慄也。終能感格親心。而成萬世之大孝。至誠能動。豈不信乎。君之事天。臣之事君。視子之事父母。其貴乎誠一也。亦在能盡之而已矣。

帝使其子九男二女。百官牛羊倉廩備。以事舜於畝畝之中。天下之士多就之者。帝將胥天下而遷之焉。爲不順於父母。如窮人無所歸。天下之士悅之。人之所欲也。而不足以解憂。好色人

之所欲。妻帝之二女。而不足以解憂。富人之所欲。富有天下。而不足以解憂。貴人之所欲。貴爲天子。而不足以解憂。人悅之。好色。富貴。無足以解憂者。惟順於父母。可以解憂。人少則慕父母。知好色。則慕少艾。有妻子。則慕妻子。仕則慕君。不得於君。則熱中。大孝終身慕父母。五十而慕者。予於大舜見之矣。

此三節書見大舜孝親無已之心也。孟子曰。舜之怨慕。豈但躬耕歷山之日爲然。當四岳

咸薦之後。帝堯將歷試諸艱。使其子九男事之。以觀其治外。二女事之。以觀其治內。凡百官有司。牛羊倉廩。莫不具備。以事舜於田野。畎畝之中。奉養侈矣。且天下之士嚮慕德化。多傾心就之者。人心附矣。帝堯見舜果有聖德。將欲盡天下移以與之。使踐天子位焉。崇高富貴極矣。舜雖得此。然自以不能喻親於道。使之順而無違。戚戚皇皇。有如窮困之人。無所依歸者。何其憂之深也。夫天下之士悅

而就之。人情所同欲也。而不足以解舜之憂。
美好之色。人情所同欲也。舜以帝堯二女爲
妻。而不足以解憂。貨財之富。人情所同欲也。
舜有天下之大。而不足以解憂。爵位之貴。人
情所同欲也。舜居天子之位。而不足以解憂。
天下之人悅之。美色事之。至富至貴加之。皆
無足以解其憂者。必何如而後可以解其憂
乎。惟順於父母。喻之於道。而得其懽心。親於
我。無所憾。我於親無所違。而後其憂始可以

解矣。今夫常人之情。當其少也。則率其知能之良。所慕者。惟父母而已。及知好色。則移慕父母之心。以慕少年美艾之女。及有妻子。則移慕父母之心。以慕妻子。及仕而事君。則移慕父母之心。以慕君。或不得於君。而遭際不偶。則躁急心熱於中。豈復有餘心。及於父母哉。常人之心。因物有遷如此。惟大孝之人。爲能不失其赤子之心。終身之所愛慕者。惟在父母。外物不得而移之。彼年至五十。而猶慕

言部事卷之三
五
親不忘者。子於大舜見之矣。蓋五十則少艾。妻子事君。俱已經歷。此心猶然不變。則終身可知矣。舜其大孝也哉。安有大孝而怨其親者乎。按自古帝王之孝。無過乎舜。後世所當師法。況舜值人倫之變。其所爲有極難者。後之安常處順。而不能盡事父母之道者。觀於此。亦可惕然自儆矣。

萬章問曰。詩云。娶妻如之何。必告父母。信斯言也。宜莫如舜。舜之不告而娶。何也。孟子曰。告則

不得娶。男女居室。人之大倫也。如告。則廢人之大倫。以懟父母。是以不告也。萬章曰。舜之不告而娶。則吾旣得聞命矣。帝之妻舜而不告。何也。曰。帝亦知告焉。則不得妻也。

此一章書。見聖人處人倫之變。而不失天理之常也。萬章問曰。齊風南山之詩有云。凡人家娶妻。其道當如之何。必告於父母而後敢娶焉。斯得其道矣。信如此詩之言。能得其道者。宜莫如舜。今舜不告於父母。而娶。帝堯之二

女。何其所爲與詩相背也。孟子曉之曰。告而後娶者。禮之常也。舜父頑母嚚。告則必爲父母所阻而不得娶。夫男女居室。上承祭祀。下綿嗣續。乃人之大倫。不可廢也。如告於父母而不得娶。則廢人之大倫。而至於無後。且徒取懟怨於父母而已。與其告而廢倫以取懟。寧通之以權。不告而娶。庶父母可無懟。而大倫可全矣。此舜之所以不告而娶也。萬章曰。舜之不告而娶。固爲達權通變之道。則吾旣

得聞夫子之敎命矣。乃帝堯以女妻舜。亦當使其父母知之。而亦不使舜告焉。何也。孟子曰。帝亦知舜之父母不可告。若告焉。則彼不欲其娶。必有違言。舜則不忍逆親而已。亦不得妻舜也。故可妻則妻。不問其告不告。知不知。此又帝堯善處人骨肉之變者也。按天下事有常有變。而道亦有經有權。漢儒釋權曰。反經合道。若舜者。孔子所謂可與權。漢儒所謂反經合道者與。雖然。子之必聽乎父。臣之

白雲子集卷之三
必聽乎君。古今共由之常道。非萬不得已。慎
毋輕言權可也。

萬章曰。父母使舜完廩。捐階。瞽瞍焚廩。使浚井。
出。從而揜之。象曰。謨蓋都君。咸我績。牛羊父母。
倉廩父母。干戈朕。琴朕。箠朕。二嫂使治朕棲。象
往入舜宮。舜在牀琴。象曰。鬱陶思君爾。忸怩。舜
曰。惟茲。臣庶。汝其于予治。不識舜。不知象之將
殺己與。曰。奚而不知也。象憂亦憂。象喜亦喜。曰。
然則舜僞喜者與。曰。否。昔者有饋生魚於鄭子。

產子產使校人畜之池校人烹之反命曰始舍之圉圉焉少則洋洋焉攸然而逝子產曰得其所哉得其所哉校人出曰孰謂子產智予既烹而食之曰得其所哉得其所哉故君子可欺以其方難罔以非其道彼以愛兄之道來故誠信而喜之奚僞焉

此二節書見聖人善處兄弟之變也萬章又問曰舜處父母之變固子道之所難乃其處兄弟之間亦有非常情可測者嘗聞舜之父

母聽象之謀。使舜完治倉廩。及舜既上廩。遂捐去其階梯。瞽瞍從下縱火焚廩。舜以兩笠自捍而下。得不死。後又使舜浚治井水。舜入井中。從匿空亡出。瞽瞍與象從而下土以掩之。象不知舜已出。乃自誇其功。曰。設謀以蓋都君於井而殺之者。皆我之功。今都君已死。其所遺之物。我將與父母分之。牛羊則歸之父母。倉廩則歸之父母。若干盾戈戟。則歸之朕。五弦之琴。瑯弓之珣。亦歸之朕。二嫂則使

治朕所棲之牀。於是象往入舜所居之宮。欲分取所有。見舜已歸而在牀彈琴。象遂飾辭以自文曰。吾鬱陶於心而不能伸者。正爲思君之甚。故來見耳。象雖僞爲其言。而終不免有忸怩之慙色。乃舜見象來而喜之曰。惟茲百官臣庶。帝所使事我者。汝其代我治之。吾不識舜之爲是言也。果不知象之將殺己而喜之與。孟子曰。象屢欲殺舜。其迹甚明。舜奚而不知也。但兄弟之情。出於天性。而聖人之

愛弟。又異於常情。平日見象之憂也。則亦感之而俱憂。平日見象之喜也。則亦感之而俱喜。彼其臣庶予治之言。亦因其鬱陶思君之言而喜之耳。何暇計其殺己之謀哉。萬章又問曰。舜知象之將殺己而猶喜也。然則舜僞喜者與。孟子曰。舜非僞喜也。彼亦信以理耳。昔者有饋送生魚於鄭大夫子產者。子產使主池沼小吏之校人畜養之於池。校人私烹其魚而食之。乃飾爲反命之辭曰。方魚之始

舍於池中也。但見其圉圉焉。有困而未舒之
狀。及少頃之間。則洋洋焉。稍覺縱適。終則攸
然而逝。自得而遠去矣。子產喜而歎曰。魚以
得水爲天。自圉圉而洋洋。又攸然而遠逝。真
自得其所哉。自得其所哉。校人出而言曰。人
皆謂子產智。以今觀之。孰謂子產智哉。夫魚
子既烹而食之矣。乃信予言而曰得其所哉。
得其所哉。不善料事。安得爲智乎。由子產之
事觀之。可見君子雖有先見之明。而亦可欺。

以理之所有。雖無逆詐之心。而終難罔以理之所無。彼象曰鬱陶思君。是以愛兄之道來。正欺以其方。猶校人之欺子產也。故舜但見其愛。不見其欺。實心信而喜之。奚僞之有。如以舜爲僞喜。則將謂子產爲僞信。校人耶。按聖人之道。誠信而已矣。舜之處父母兄弟。與其爲天子而治天下。無往而不以誠行之。若夫僞則無所施而可。而况父子兄弟之間乎。以誠感者。亦以誠應。以僞感者。亦以僞應。周

易中孚之彖曰。中孚。豚魚吉。利涉大川。豚魚
可感。而況於人乎。學舜者亦慎所以感人者
而可矣。

萬章問曰。象曰。以殺舜爲事。立爲天子。則放之。
何也。孟子曰。封之也。或曰放焉。萬章曰。舜流共
工于幽州。放驩兜于崇山。殺三苗于三危。殛鯀
于羽山。四罪而天下咸服。誅不仁也。象至不仁。
封之有庠。有庠之人奚罪焉。仁人固如是乎。在
他人則誅之。在弟則封之。曰。仁人之於弟也。不

藏怒焉。不宿怨焉。親愛之而已矣。親之欲其貴也。愛之欲其富也。封之有庠。富貴之也。身爲天子。弟爲匹夫。可謂親愛之乎。敢問或曰。放者何謂也。曰。象不得有爲於其國。天子使吏治其國。而納其貢稅焉。故謂之放。豈得暴彼民哉。雖然。欲常常而見之。故源源而來。不及貢以政接于有庠。此之謂也。

此一章書。見舜待弟盡親愛之仁也。萬章問曰。象之於舜。焚廩未遂。浚井繼之。日日以殺

舜爲事。此誠舜之讐也。及舜旣立爲天子而操生殺之權。卽誅之亦不爲過。而僅放之。何也。孟子曰。舜實以爵土封象。而或者誤以爲放焉。放且不爲。况誅之乎。萬章又問曰。舜之爲君也。以共工靜言庸違。則流於北裔。幽州之地。以驩兜同惡相濟。則放於南裔。崇山之地。負固不服者。三苗也。則殺於西裔。三危。治。水無功者。鯀也。則殛於東裔。羽山。罪此四人。而天下咸服。其用刑之當。以所誅者皆不仁。

之入也。象至不仁。其罪豈在共工諸人之下。廼不以誅四凶者誅之。而反封之有庠。有庠之人何罪。而遭象不仁之人爲之君長也。仁人之用心。固如是其輕重不均。在他人則誅之以安民。在弟則封之以貽害乎。孟子曰。仁人之於弟。與處他人不同。本非有怒。何怒之可藏匿焉。本非有怨。何怨之可畱宿焉。但知篤同氣之親。隆一體之愛而已矣。親之則不忍。己貴弟賤而勢分懸隔。必欲其貴也。愛之。

則不忍己富第貧而置之窮困。必欲其富也。今封象於有庠。正欲富貴之。以致親愛之情也。苟舜身爲天子而富且貴。弟爲匹夫而貧且賤。情隔於位之疎。恩衰於祿之薄。可謂親愛之乎。不能親愛。可謂仁人乎。此舜之封象正爲仁人也。萬章又問曰。封與放本異也。舜旣封象。敢問或曰放者。果何謂也。孟子曰。象雖封爲有庠之君。然不得有所施爲於其國。天子使吏代治其國。但納其所收之貢稅於

象。其迹有似於放。故或者誤謂之放也。象既不得有爲於其國。亦豈得暴有庠之民哉。然而舜之心。又不止爲愛民也。蓋其親愛之心。無已。欲常常見象。不令疎濶。故使吏代治者。使象無治事之煩。得以源源而來見也。古書之辭有云。舜不待及諸侯朝貢之期。而以政事接見有庠之君。正此源源而來之謂也。是舜之封象。固所以爲仁。而使吏代治。又孰非所以成其仁哉。舜之於象。仁之至。義之盡。旣

不以法傷恩。亦不以恩害法。後世待藩封者。取法於此。周五霸。漢七國之禍。庶幾免夫。

咸丘蒙問曰。語云。盛德之士。君不得而臣。父不得而子。舜南面而立。堯帥諸侯北面而朝之。瞽瞍亦北面而朝之。舜見瞽瞍。其容有憾。孔子曰。於斯時也。天下殆哉。岌岌乎。不識此語誠然乎哉。孟子曰。否。此非君子之言。齊東野人之語也。堯老而舜攝也。堯典曰。二十有八載。放勳乃徂落。百姓如喪考妣。三年。四海遏密八音。孔子曰。

世說新語卷之三
天無二日。民無二王。舜既爲天子矣。又帥天下諸侯以爲堯三年喪。是二天子矣。

此一章書。辯舜無臣父。臣堯之事也。咸丘蒙問曰。古語有云。凡天下之常禮止。可以論天下之常人。若夫聖德非常之士。雖至尊如君。苟無其德。不得而以之爲臣。至親如父。苟無其德。不得而以之爲子。舜惟有聖人之德。一旦居天子之位。南面而立。堯雖爲其君。不得不帥諸侯北面而朝之。瞽瞍雖爲其父。亦不

得不北面而朝之。爾時舜雖安於堯而不能
不動心於父。望見瞽瞍。其容蹙然不能自安。
孔子有感於此事。因歎息曰。於斯時也。君臣
父子之倫皆亂。天下將危殆哉。岌岌乎其勢
已不可支矣。所聞古語者如此。不識此語誠
然乎哉。孟子曰。否。舜之處君臣父子。無是事
也。此非君子據實可信之言。乃齊東野人鄙
妄無稽之語也。何以辨之。蓋當堯在之時。舜
未嘗爲天子也。特以堯老不治事。舜代攝天

子之事耳。天子之位。固在堯也。何由北面而朝之乎。且吾言有所證也。堯典曰。舜攝位二十有八載。於是放大功勲之堯。乃魂升魄降而崩。國中百姓。慟堯之歿。如自喪其考妣。三年之間。四海斷絕音樂。靜密如一。更不聞有金石絲竹等之八音。其思慕之深如此。據堯典所言。舜之卽位。在堯崩之後。不在其攝政之時明矣。何從南面而受堯之朝乎。孔子亦嘗有云。運於天者。無有二日。統乎民者。無有

二王。若堯未崩時。舜既爲天子矣。及堯崩時。舜又帥天下諸侯。以爲堯行三年之喪。則是舜一天子。堯又一天子。而有二天子矣。豈民無二王之理乎。然則臣堯之說。可不辯而自見其誣矣。按堯典之文。尚有二說。一曰百姓者。畿內之民也。四海者。畿外之民也。此以遠邇而論者也。一曰百姓者。百官也。經傳言百姓。或爲百官。或爲萬民。其以百官爲百姓者。古者民無姓。其有姓者。皆有土有爵者也。黃

帝有子二十五人。得姓者十有四人。是也。百官如喪考妣三年。而四海之民。遏密八音。此以貴賤而辨者也。二說後說爲是。唐臣張說嘗爲其君言之矣。以其關於禮也。故併及之。咸丘蒙曰。舜之不臣堯。則吾旣得聞命矣。詩云。普天之下。莫非王土。率土之濱。莫非王臣。而舜旣爲天子矣。敢問瞽瞍之非臣如何。曰。是詩也。非是之謂也。勞於王事。而不得養父母也。曰。此莫非王事。我獨賢勞也。故說詩者。不以文害辭。

不以辭害志。以意逆志。是爲得之。如以辭而已矣。雲漢之詩曰。周餘黎民。靡有孑遺。信斯言也。是周無遺民也。

此一節書孟子辯舜無臣父之事。而兼示人讀詩之法也。咸丘蒙又問曰。舜無臣堯之事。則吾旣得聞教矣。乃其不臣瞽瞍。則尚有可疑者。小雅北山之詩有云。普天之下。其地雖廣。無尺地而非王土。率土之濱。其人雖衆。無一民而非王臣。由此詩推之。舜旣受堯之禪。

而爲天子矣。則瞽瞍亦王臣中之一人耳。乃獨不謂之臣。此何說耶。孟子曰。詩人之旨。各有所寓。是詩所言。非天子可臣其父之謂也。乃當時大夫行役於外。爲王事所迫。而不得歸養其親。因不平而作是詩。其意若曰。今此之事。莫非王事。凡居王土而爲王臣者。皆當同服其勞。何爲彼皆安坐。獨我爲賢而可用。更不可以休息乎。此詩人之本意也。凡詩之所貴者。意而已。不在文辭之間也。是以善說

詩者不可泥一字之文。而害一句之辭。不可泥一句之辭。而害設辭之志。惟當以我之意。採取詩人之志。是爲得說詩之法者矣。若但拘泥其辭。而不求其志。則大雅雲漢之詩。有云。周遭饑饉。所餘黎民。無有孑然獨存者。信如此詩所言。是周之民。真無遺種也。惟以意通之。則知詩人之志。在於憂旱之甚。若天絕其生耳。非真無遺民也。然則北山之詩。豈真謂莫非王臣。而天子可臣其父哉。子乃以辭

而害其志。則亦不善說詩者矣。按學貴於博。辨貴於明。雖芻蕘可採。而杜撰無稽者勿聽。雖經學可尊。而注疏謬誤者亦多。聖經賢傳。昭如日星。而學者每各守一說。能必其盡合於聖賢之意。而不至如咸丘蒙之說詩乎。博蒐諸家。歸於一是。廣儒生之聞見。訂經傳之指歸。其亦右文之世。所當急講者與。

孝子之至。莫大乎尊親。尊親之至。莫大乎以天下養。爲天子父。尊之至也。以天下養。養之至也。

詩曰。永言孝思。孝思維則。此之謂也。書曰。祇載見瞽瞍。夔夔齊栗。瞽瞍亦允若。是爲父不得而子也。

此二節書見舜之大孝。能尊親而格親也。孟子又曉成丘蒙曰。子以舜爲天子。則當臣其父。吾以舜爲天子。正所以孝其親耳。蓋爲人子者。苟能善事其親。皆可謂孝子。而非孝子之至。孝子之至。莫大乎能尊崇其親。爲人子者。苟有一命之榮。鍾釜之祿。皆可謂之尊親。

而非尊親之至。尊親之至。莫大乎能以天下
爲養。瞽瞍爲天子之父。是尊之至而無以加
也。以天下爲養。是養之至而無以加也。養之
至。乃爲尊之至。尊之至。乃爲孝之至。大雅下
武之詩曰。武王能長言孝思而不忘。其孝思
可以爲事親之法則。卽此尊之至。養之至。爲
法於天下之謂也。豈有尊養可法者。乃至於
以父爲臣乎。然而所謂父不得而子者。亦有
說也。書經大禹謨有曰。舜平時致敬爲子之

職事。及見於瞽瞍之時。又夔夔然敬謹恐懼之至。瞽瞍雖頑。亦爲其所化。允信而若順之。卽此書所言。可見瞽瞍不能以不善及其子。而反見化於其子。是所謂父不得而子也。豈有臣父之說乎。由孟子論父不得而子之說。推而言之。如伊尹之格太甲。周公之感成王。是亦可謂君不得而臣也。夫父不得而子。而後始有底豫之慈父。君不得而臣。而後始有守成之賢君。始若相反。卒乃相成。凡爲君臣。

父子者可不深長思與。

萬章曰。堯以天下與舜。有諸。孟子曰。否。天子不能以天下與人。然則舜有天下也。孰與之。曰。天與之。天與之者。諄諄然命之乎。曰。否。天不言。以行與事示之而已矣。曰。以行與事示之者。如之何。曰。天子能薦人於天。不能使天與之天下。諸侯能薦人於天子。不能使天子與之諸侯。大夫能薦人於諸侯。不能使諸侯與之大夫。昔者堯薦舜於天。而天受之。暴之於民。而民受之。故曰。

天不言以行與事示之而已矣。曰：敢問薦之於天而天受之，暴之於民而民受之，如何？曰：使之主祭而百神享之，是天受之；使之主事而事治，百姓安之，是民受之也。天與之人與之，故曰天子不能以天下與人。

此一章書見堯之禪舜出於天與也。萬章問曰：事莫大於禪授，人皆言古有帝堯，嘗舉其所有之天下，一旦授之於舜，不知果有此事否乎？孟子曰：斯言殆不然也。蓋天下者，天下

之天下。非天子所得私也。堯雖爲天子。安能以天下與人。若曰堯能與之。則天下亦一人之私物。可以有之自我。與之自我。豈理也哉。萬章問曰。堯旣不能以天下與舜。然則舜之有天下也。果孰與之。孟子曰。帝王之興。皆由天命。舜有天下。天實與之。而堯特順天以從事耳。萬章問曰。所謂天與之者。天果諄諄然教命之乎。不然。何所據以爲天與也。孟子曰。天之體於穆無言。其與舜也。固非諄諄然教

命之也。蓋身之所行曰行。措諸事爲曰事。天之與舜。但就舜之行與事默示其與之之意而已矣。豈待諄諄然以言命之乎。萬章曰。以行與事示之者。必有示之之迹。敢問天果何如示之耶。孟子曰。凡事在人者。可以力爲。而在天者。不可取必。人有才德。可托以天下者。天子能舉而薦之於天。然天意之從違。尚未可知。不能使天必與之天下。正如諸侯能薦人於天子。許其可任一國之事。而不能取必。

於天子。使與之諸侯。蓋天子者諸侯之天也。
大夫能薦人於諸侯。許其可任一家之事。而
不能取必於諸侯。使與之大夫。蓋諸侯者大
夫之天也。諸侯大夫且然而況天子之重乎。
昔者堯薦舜於天。以稽天意之從違。乃舜之
行事當乎天心。而天受之。嘗顯舜之德於民。
以觀人心之向背。乃舜之行事協乎民心。而
民受之。卽此天人交與。而天示之意卽在是。
吾故曰。天不言。以行與事示之而已矣。萬章

曰。堯薦舜於天而天受之。顯舜於民而民受之。其薦之顯之受之。必有其實。敢問如何。孟子曰。昔堯嘗命舜使主天地山川之祭。其精誠之所感孚。幽無不格。百神皆歆其祀而享之。此薦之於天而天受之也。又嘗命舜使主治教刑政之事。其德意之所注措。事無不治。百姓皆被其化而安之。此暴之於民而民受之也。天受之者。天與之也。固天也。人受之者。人與之也。亦天也。信乎舜之有天下。爲天與。

也。堯何預焉。故曰。天子不能以天下與人。按
天與之說。非獨孟子言之也。位曰天位。祿曰
天祿。命曰天命。自古記之矣。天旣與之。則人
不能攘之。彼圖度非分者。祇自速天誅耳。然
天能與之。則亦能奪之。慄慄危懼。聿脩厥德。
以永保天命。爲人君者。可不勉與。

舜相堯二十有八載。非人之所能爲也。天也。堯
崩三年之喪畢。舜避堯之子於南河之南。天下
諸侯朝覲者。不之堯之子而之舜。訟獄者。不之

堯之子而之舜。謳歌者不謳歌堯之子而謳歌舜。故曰天也。夫然後之中國。踐天子位焉。而居堯之宮。逼堯之子。是篡也。非天與也。太誓曰。天視自我民視。天聽自我民聽。此之謂也。

此二節書見舜之天下出於天與。而天意不越民情也。孟子又告萬章曰。天之與舜。不特見諸行與事之間。揆之氣數。卜之人情。皆有可驗者。舜之相堯。二十有八載。歷年多而施澤久。此非人之所能爲也。蓋天也。則其爲相

之時。天意已屬之矣。至於堯崩之後。三年之喪已畢。舜以有堯之子丹朱在焉。於是避而遠去。居於南河之南。欲天下思堯德而歸其子也。然舜能避堯之子。而不能避天下之人。心。天下諸侯朝覲者。久被其賓接之禮。不之堯之子而之舜。訟其不決之獄。而求直者。久念其欽恤之仁。不之堯之子而之舜。歌頌功德者。久感其好生之德。不謳歌堯之子而謳歌舜。舜方避之。民顧就之。此豈人力能爲也。

哉。吾故曰。實天使之固結於二十八載之前。乃致此響應於二十八載之後也。夫然後自南河之南。往中國而踐天子位焉。此雖以答天下之心。實所以承上天之意耳。向使舜不爲南河之避。而遽居處乎堯之宮。逼脅乎堯之子。則是以臣而篡君之位也。安所稱天與哉。卽舜爲民心之所歸。便知爲天心之所與。此非無徵之言也。書經泰誓篇有曰。天無視也。而從民之視。民視卽是天視。天無聽也。而

從民之聽。民聽卽是天聽。書之所言。此卽吾民歸舜卽天與舜之說也。然則舜之有天下。不但堯不能容心於與。而舜亦未常有心於得。徒泥其禪授之迹者。亦未明乎天道矣。按孟子此章以天下歸之天。以天與歸之民。何其言之斷也。不獨禪讓之天下爲然。雖家天下之天下亦然。不獨開創之天下爲然。雖繼世之天下亦然。彼不求天於民視民聽而求之於荒唐怪妄。如宋世所謂天書者。其亦不

學之過與。

萬章問曰。人有言。至於禹而德衰。不傳於賢而傳於子。有諸。孟子曰。否。不然也。天與賢。則與賢。天與子。則與子。昔者舜薦禹於天。十有七年。舜崩。三年之喪畢。禹避舜之子於陽城。天下之民從之。若堯崩之後。不從堯之子而從舜也。禹薦益於天。七年。禹崩。三年之喪畢。益避禹之子於箕山之陰。朝覲訟獄者。不之益而之啓。曰。吾君之子也。謳歌者。不謳歌益而謳歌啓。曰。吾君之

子也。丹朱之不肖。舜之子亦不肖。舜之相堯。禹之相舜也。歷年多。施澤於民久。啓賢能敬承繼禹之道。益之相禹也。歷年少。施澤於民未久。舜禹益相去久遠。其子之賢不肖。皆天也。非人之所能爲也。莫之爲而爲者。天也。莫之致而至者。命也。

此一章書見帝王傳賢傳子皆本天意而無私也。萬章問曰。人有言堯舜盛德之至。故以天下爲公。不傳於子而傳於賢。及至於禹。其

德遂衰。於是不傳於賢而傳於子。敢問禹果有此私心乎。孟子曰。人以德衰。議禹。此言非是。禹之心殆不然也。蓋與賢與子。顧天意何如耳。天所與者在賢。則與賢。不能強而與子也。天所與者在子。則與子。不能強而與賢也。昔者舜薦禹於天。任以爲相。十有七年。迨舜崩。三年之喪旣畢。禹因舜有子商均在焉。乃遠避於陽城之地。其心止欲讓位於商均耳。乃天下之民皆歸心於禹。凡朝覲訟獄謳歌。

者皆不從商均而從禹。與堯崩之後。不從堯之子而從舜。無以異也。人心如此。天意在禹可知。舜安得不舉天下而授之乎。若禹益之時。則視此不同矣。禹亦嘗薦益於天。任以爲相者七年。迨禹崩。三年之喪旣畢。益因禹有子啓在。亦遠避啓於箕山之陰。以讓位焉。但見天下之臣民。朝覲訟獄者。不往歸益而來歸啓。皆曰。此吾君之子也。吾不歸吾君之子而誰歸乎。謳歌者。亦不謳歌益而謳歌啓。皆

曰此吾君之子也。吾不戴吾君之子而誰戴乎。人心如此。天意在啓可知。禹安得不舉天下而傳之也。舜禹益皆有聖人之德。而當時民心或歸或不歸。其故維何。蓋堯之子丹朱其德不類於堯。舜之子商均其德亦不類於舜。而舜之相堯二十有八年。禹之相舜十有七年。其歷年旣多。施恩澤於民最久。以相之賢。又遇子之不肖。此民所以不歸堯舜之子而歸舜禹也。若啓之賢。能以兢兢業業之心。

嗣守禹之典則而益之相禹僅僅七年其德澤施於民者未如舜禹之久以子之賢而又遇相之不久此民所以不歸益而歸啓也夫舜禹益均之爲相而歷年多歷年少其久近相去如此丹朱商均與啓均之爲子而或賢或不肖又如此皆天也豈人力之所能預哉蓋天下事凡人力莫之作爲而自然爲者是之謂天主宰於冲漠之中不可得而測也凡人力莫之召致而自然至者是之謂命稟受

於有生之初不可得而移也。然則堯舜禹皆奉天命以從事耳。豈其德之有盛衰哉。按傳賢傳子。雖曰皆出於天。其實天意常在於賢。傳子亦傳賢也。後世爲天子之子者。能自力於賢。爲天子者。能豫教其子以賢。實萬世無疆之休也。

匹夫而有天下者。德必若舜禹。而又有天子薦之者。故仲尼不有天下。繼世以有天下。天之所廢。必若桀紂者也。故益伊尹周公不有天下。伊

尹相湯以王於天下。湯崩太丁未立。外丙二年仲壬四年。太甲顛覆湯之典刑。伊尹放之於桐三年。太甲悔過。自怨自艾。於桐處仁遷義三年。以聽伊尹之訓己也。復歸于亳。周公之不有天下。猶益之於夏。伊尹之於殷也。孔子曰。唐虞禪夏。后殷周繼其義一也。

此五節書。歷舉羣聖之不有天下。皆以推明禹益之事也。孟子告萬章曰。益之不有天下。固由於天。而自古聖人。不有天下者。不獨一

益也。凡匹夫而有天下者。必有同乎舜禹之德。而又有堯舜之天子薦之於天。而後可以得之。故仲尼之德。雖無愧於舜禹。而無堯舜之薦。亦終老於布衣。而不有天下也。若夫有德有薦。而亦不有天下者。則以繼世之君爲賢君耳。蓋繼世以有天下者。非德不如聖人。天遂廢之也。天之所廢者。必大惡如桀紂也。苟不至桀紂而足以嗣守先業。則天亦未嘗遽廢之。故益與伊尹周公。雖有舜禹之德。而

遇嗣君之賢。終不能有天下也。以伊尹言之。
伊尹以聖人之德。輔相成湯。致王於天下。其
功業可謂盛矣。迨成湯既崩。太子太丁未立。
先歿。商時之法。兄終弟及。乃立其弟外丙。二
年而歿。又立其弟仲壬。四年而歿。於是立太
丁之子太甲。太甲既立。壞亂湯之成法。似不
肖矣。伊尹因放之於湯墓桐宮三年。欲其顧
乃祖而興思也。太甲果能悔其所爲之過。自
怨而懲。劓已往。自艾而脩治方來。朝夕於桐

改不仁以處於仁。改不義以遷於義。三年之內。惟聽伊尹之教訓乎已也。伊尹見太甲之賢。於是以袞冕迎之。復歸於亳都。以纘湯緒焉。此伊尹所以不有天下也。若周公之終於豕宰。而不有周之天下者。以公遇成王。繼世之賢。猶益之於夏。以啓賢之足以嗣禹也。猶伊尹之於殷。以太甲賢足以繼殷也。此周公所以不有天下也。吾嘗聞孔子曰。唐虞禪位。而以天下傳之賢。三代繼統。而以天下傳之

子述雖不同。然禪者以天命在賢。宜禪而禪。繼者以天命在子。宜繼而繼。其合於義則一而已。聖人何容私於其間哉。觀孔子之言。則禹之與子。孰謂其德衰哉。嘗又論之。繼世之君。雖曰中材。亦可保守天命。天意不肖輕於奪之。然未可恃也。如太甲者。不已戔戔乎。與治同道罔不興。與亂同事罔不亡。伊尹於太甲歸亳之後。猶申誥焉。後之繼世者。尚二復於斯。

萬章問曰。人有言。伊尹以割烹要湯。有諸。孟子
曰。否。不然。伊尹耕於有莘之野。而樂堯舜之道
焉。非其義也。非其道也。祿之以天下。弗顧也。繫
馬千駟。弗視也。非其義也。非其道也。一介不以
與人。一介不以取諸人。湯使人以幣聘之。囁囁
然曰。我何以湯之聘幣爲哉。我豈若處畎畝之
中。由是以樂堯舜之道哉。

此一章書。是辯伊尹無辱己之行也。萬章問
曰。人有言。伊尹欲行道致君而無由。乃身爲

庖人。因論割烹之事。而喻及王道。使湯知而用之。果有此事乎。孟子曰。人言不足信。伊尹所爲。不若是也。方伊尹未遇之時。嘗耕於有莘之野。而欣慕愛樂者。則在堯舜之道焉。道之至辨者。爲義。非其義也。則非其道也。雖祿之以天下之大。亦弗顧也。繫馬千駟之多。亦弗視也。不特此也。非其義也。則非其道也。雖一介之微。不以與人也。一介之微。不以取諸人也。何者。其所樂有在也。湯聞伊尹之道。使

人以幣帛徵聘之。伊尹知有堯舜而不知有湯也。乃囂囂然自得而言曰。我何用湯之聘幣爲哉。一受其聘。則當憂其憂而事其事。我豈若處畝畝之中。由是以樂堯舜之道。浩然自得之爲安哉。此非觀湯意之誠否也。內旣自樂於己。外自無求於人。視湯之聘幣。誠爲外物耳。夫湯以幣聘伊尹。伊尹猶不冝輕出如此。豈有割烹要湯之事哉。按伊尹之在有莘。諸葛亮之在隆中。惟其處而無求。所以出

而能任。然非其君求之之勤。則亦終老田間矣。是以爲人臣者。不可不以伊葛自待。而爲人君者。亦不可不以成湯昭烈爲法也。

湯三使往聘之。旣而幡然改曰。與我處畎畝之中。由是以樂堯舜之道。吾豈若使是君爲堯舜之君哉。吾豈若使是民爲堯舜之民哉。吾豈若於吾身親見之哉。天之生此民也。使先知覺後知。使先覺覺後覺也。予天民之先覺者也。予將以斯道覺斯民也。非予覺之而誰也。思天下之

民匹夫匹婦有不被堯舜之澤者。若已推而內之溝中。其自任以天下之重如此。故就湯而說之。以伐夏救民。

此三節書。是言伊尹應湯之聘。欲行堯舜之道於天下也。孟子曰。湯三次使人以幣聘伊尹。其求賢之意甚誠。有以動伊尹行道之心。於是翻然改曰。吾人出處關乎世運。我終處畎畝之中。由是以樂堯舜之道。祇獨善其身而已。吾豈若以其道致君。使是君欽明濬哲。

爲堯舜之君哉。吾豈若以其道澤民。使是民時雍風動。爲堯舜之民哉。吾豈若於上下君民之間。卽吾身今日。親見堯舜之道得行哉。吾之所以不敢辭其責者。蓋以天之生此民也。知覺雖然同具。而先後固有難齊。天欲使先知此事者。覺悟後知之人。使先覺此理者。覺悟後覺之人。予於天所生民之中。幸爲先覺者也。其可負天意哉。予將以斯道之固有。覺斯民之未覺也。若使非予覺之。則迷者益

滾誰爲予受其責哉。此今日之不容以不出也。伊尹之言如此。卽其言以推其心。伊尹真見萬物同體。思天下之民。匹夫匹婦有不與被堯舜之澤者。卽若己推而內之溝中。其情不能安。其義不容諉。以一人之身。任天下之重如此。故就湯而說之。以伐無道之夏。而救無罪之民。此其自待何如哉。先知覺後知。先覺覺後覺。先儒謂此卽大學之道。旣明明德。則必須新民。非如此。則在我之分量不完。伊

尹未仕湯。一匹夫耳。猶不肖以此自寬。况作君作師。實有代天理物之責者乎。

吾未聞枉己而正人者也。况辱己以正天下者乎。聖人之行不同也。或遠或近。或去或不去。歸潔其身而已矣。吾聞其以堯舜之道要湯。未聞以割烹也。伊訓曰。天誅造攻自牧宮。朕載自亳。此三節書。是明伊尹決無割烹要湯之事也。孟子曰。伊尹之伐夏救民。無非欲正天下。吾未聞枉在己而能正他人者。况於卑污苟賤。

爲辱己之事。更甚於枉己矣。而能正天下乎。
大凡古來聖人之行不同。未仕之先。或遠而
隱遁。或近而仕君。旣仕之後。或不合而去。或
合而不去。遠者非忘世。而近者非慕祿。去者
非沽名。而不去者非固寵。因其時而裁以義。
要歸於潔其身而已矣。身之不潔。何以謂之
聖人。而謂伊尹有要湯之事乎。必如人言。謂
之爲要。吾但聞其耕莘時。唯樂堯舜之道。因
而致湯之幣聘。是以堯舜之道要湯者。若割

烹誠未聞也。伊訓有曰。湯奉天誅。始攻桀於
牧宮。由我相湯。始其事於亳都也。觀伊尹之
言。益可証其伐夏救民。自任天下之重之實。
曾謂辱己要君者而能爲此乎。流俗之誣。不
辯而自明矣。蓋出處人生之大閑。始進不以
正。後未有能正者。自古及今。莫不皆然。明主
觀人。須於此嚴辨之。

萬章問曰。或謂孔子於衛主癰疽。於齊主侍人
瘠環。有諸乎。孟子曰。否。不然也。好事者爲之也。

於衛主顏讎由。彌子之妻與子路之妻兄弟也。
彌子謂子路曰。孔子主我。衛卿可得也。子路以
告。孔子曰。有命。孔子進以禮。退以義。得之不得
曰有命。而主癰疽與侍人瘠環。是無義無命也。
孔子不悅於魯衛。遭宋桓司馬將要而殺之。微
服而過宋。是時孔子當阨。主司城貞子爲陳侯
周臣。吾聞觀近臣以其所爲主。觀遠臣以其所
主。若孔子主癰疽與侍人瘠環。何以爲孔子。

此一章書。是明孔子秉持禮義。卽所主亦必

不苟。以見人言之誣也。萬章問曰。或謂孔子
在衛。主衛君。近狎之人。爲癰疽者。在齊。主齊
君。近狎之侍人名瘠環者。果有諸乎。孟子曰。
否。不然也。好事者爲此言。欲誣聖人以便己
私也。曾聞孔子於衛。主於賢大夫顏讎由之
家。彼時衛君近狎。莫如彌子瑕。彌子瑕之妻
與子路之妻兄弟也。彌子因謂子路曰。孔子
舍讎由而主我。則衛卿可得也。子路以告孔
子。孔子曰。衛卿之得。有命存焉。非彼所能爲。

也。何必主之。夫孔子平日。凡有進也。必從容
遜順。而以禮。不易進也。凡有退也。必果斷剛
決。而以義。不難退也。蓋禮義盡其在我。至於
爵位之得與不得。則道之將行。道之將廢。曰
有命耳。孔子之爲孔子如此。而主癰疽與侍
人瘠環。則義之當退而不退。是無義矣。命之
不得而思得。是無命矣。於平日之言行。安在
耶。且孔子不但無事之時。不苟所主也。嘗不
悅於魯與衛而去之。宋遭宋司馬桓魋將要。

而殺之。遂微服而過宋。當是時也。孔子正當
阨難。猶不苟所主。去宋適陳。主司城貞子之
家。蓋司城貞子。乃宋之賢大夫。此時適爲陳
侯周之臣者也。故孔子主之。總之邪正不同。
人各從類。吾聞觀近臣之爲人何如。但於其
爲遠人之主觀之。或爲君子主。或爲小人主。
而近臣可知矣。觀遠臣之爲人何如。但於其
所主之人觀之。或主於君子。或主於小人。而
遠臣可知矣。彼孔子何等人也。所主必其類。

若主癰疽與侍人瘠環。何以爲孔子。好事者何容誣哉。宋臣張栻言此雖辯孔子不苟主而泛言觀人之法。實萬世爲人君者所不可不知。從來小人之進。君子之退。無不因左右近倖播弄於其間。人君欲察外廷之賢否。而寄耳目於此輩。則威福未有不爲所盜竊者。非深鑒其弊。烏能當此不惑哉。

萬章問曰。或曰。百里奚自鬻於秦養牲者。五羊之皮。食牛以要秦穆公。信乎。孟子曰。否。不然。好

事者爲之也。百里奚。虞人也。晉人以垂棘之璧。與屈產之乘。假道於虞。以伐虢。宮之奇諫。百里奚不諫。知虞公之不可諫而去之秦。年已七十矣。曾不知以食牛干秦穆公之爲汙也。可謂智乎。不可諫而不諫。可謂不智乎。知虞公之將亡而先去之。不可謂不智也。時舉於秦。知穆公之可與有行也。而相之。可謂不智乎。相秦而顯其君於天下。可傳於後世。不賢而能之乎。自鬻以成其君。鄉黨自好者不爲。而謂賢者爲之乎。

此一章書是明百里奚必無辱身干主之事。以見人言之誣也。萬章問曰。或有人言。百里奚自賣於秦。養牲者之家。得五羊之皮。而爲之食牛。因以干秦穆公。信有之乎。孟子曰。否。不然。乃好事者爲之以借口也。嘗聞之。百里奚本虞國人也。仕於虞時。晉人以垂棘所出之美玉。與屈地所產之良馬。求假道於虞。以伐虢。虞臣宮之奇諫。虞公不聽。百里奚因而諫。非不能諫也。蓋知虞公之爲人。不可以

諫。而因去之秦也。當其時。奚年已七十矣。是其歷練老成。曾不知以食牛干秦。穆公爲汙辱之行。尚可謂之智乎。吾嘗反覆推之。奚非不智者也。天下唯智者能不失言於人。知虞公之不可諫而不諫。是當默而默。可謂不智乎。天下唯智者能知廢。知虞公之將亡而先去之。是見幾而作。不可謂不智也。天下又唯智者能知興。奚之至秦。時有舉於秦者。知繆公之可與有行也。而輔相之。是擇君而事。可

謂不智乎。且奚之相秦。取威定霸。顯其君於天下。而芳聲令聞。可傳於後世。不賢而能之乎。若自鬻其身。以成就君事。卽鄉黨之間。稍稍自愛者。不爲。而謂賢如奚者。肯爲此事乎。人言之誣。斷可識矣。大抵戰國時。人人急於功利。遂謂古聖賢亦如此。故孟子力辨之。不獨伊尹孔子大聖。斷無此事。卽百里奚。霸國之佐。亦決不然。後世士大夫。寡廉鮮恥。凡可以得富貴者。靡所不爲。而患得患失之禍。遂

延於世運。管子曰。禮義廉恥。國之四維。從來
未有人心不端。風俗不正。而可以致治者。其
係豈一人一事已哉。

日講四書解義卷之二十二

孟子

下之四

萬章章句下

孟子曰。伯夷目不視惡色。耳不聽惡聲。非其君
不事。非其民不使。治則進。亂則退。橫政之所出。
橫民之所止。不忍居也。思與鄉人處。如以朝衣
朝冠。坐於塗炭也。當紂之時。居北海之濱。以待
天下之清也。故聞伯夷之風者。頑夫廉。懦夫有
立志。伊尹曰。何事非君。何使非民。治亦進。亂亦

進曰。天之生斯民也。使先知覺後知。使先覺覺後覺。予天民之先覺者也。予將以此道覺此民也。思天下之民。匹夫匹婦有不與被堯舜之澤者。若己推而內之溝中。其自任以天下之重也。柳下惠不羞汙君。不辭小官。進不隱賢。必以其道遺佚而不怨。阨窮而不憫。與鄉人處。由由然不忍去也。爾爲爾。我爲我。雖袒裼裸裎於我側。爾焉能浼我哉。故聞柳下惠之風者。鄙夫寬。薄夫敦。孔子之去齊。接淅而行。去魯。曰遲遲吾行。

也。去父母國之道也。可以速而速。可以久而久。可以處而處。可以仕而仕。孔子也。

此一章書是孟子歷叙羣聖之行事。而極尊孔子。以隱寓其願學之意也。曰。學不宗至聖。則其統不一。然不取羣聖折衷之。則其道亦不著。嘗考伯夷。目不視非禮之惡色。耳不聽非禮之惡聲。視聽如此。其不苟也。非可事之君不事。非可使之民不使。事使如此。其甚嚴也。世治則進而仕。世亂則退而隱。進退如此。

其有擇也。不特是也。卽橫暴之政之所出。橫暴之民之所止。亦不忍居也。不但橫暴不居。其心卽思與鄉人斲處。如以朝衣朝冠之貴。坐於塗炭之汙。而唯恐其浼已也。當殷紂濁亂之時。避居北海之濱。以待天下之清。故後世間伯夷之風者。雖頑而無知之夫。亦化而爲廉。雖懦而無守之夫。亦化而有特立之志。是伯夷之行事如此。又嘗稽之伊尹矣。伊尹嘗曰。君皆可事。何所事而非君。民皆可使。何

所使而非民。其言如此。故其爲行也。治亦進而仕。亂亦進而仕。以求盡其事。君使民之責焉。而因以自任曰。天之生斯民也。原欲使先知其事者。覺後知之人。使先覺其理者。覺後覺之人。予今幸爲天所生。民之先覺者也。予將以此先知先覺之道。覺此後知後覺之民。而不敢負天之託也。由其言以推其心思天下之民。但有匹夫匹婦。不與被堯舜之澤者。卽若己推而內之溝中。是其以一人之身。而

自任天下之重也。是伊尹之行事又如此。又嘗稽諸柳下惠矣。不以汙君爲羞而不事。不以小官爲卑而遂辭。其進而事汙君爲小官也。不隱其在己之賢能。而必行己之直道。至於爲人所遺佚。而無怨恨之意。卽由是以阨窮其身。而亦無憂憫之情。不特是也。卽與鄉里之人並處。而其中亦油然自得。與之偕而不忍去也。嘗自言曰。爾自爲爾。我自爲我。雖袒裼裸裎。失禮於我側。亦爾之無禮耳。焉能

有免於我守禮之身哉。故後世聞柳下惠之風者。雖狹陋之夫。亦化而爲寬大之量。刻薄之夫。亦化而爲敦厚之行。是柳下惠之行事如此。若夫孔子之行。則獨有異焉者。當其於齊也。因晏嬰之沮而去焉。則接淅而行。不容頃刻而留也。及其於魯也。因女樂之受而去焉。然猶有待於膳肉之至。曰遲遲吾行也。夫其所以遲遲者。爲去父母宗國之道而不忍。恣然於此也。卽此觀之。其或速也。非失之急。

迫可以速而速。或久也。非失之濡滯。可以久而久。或處也。非以隱爲高。可以處而處。或仕也。非以位爲榮。可以仕而仕。蓋其神妙莫測。與元化同流。而絕無意必固我之私。是孔子之行事又如此。

孟子曰。伯夷。聖之清者也。伊尹。聖之任者也。柳下惠。聖之和者也。孔子。聖之時者也。孔子之謂集大成。集大成也者。金聲而玉振之也。金聲也者。始條理也。玉振之也者。終條理也。始條理者。

智之事也。終條理者。聖之事也。智譬則巧也。聖譬則力也。由射於百步之外也。其至爾力也。其中非爾力也。

此三節書。是言孔子時中之聖。能兼三聖之事也。孟子歷叙羣聖之後。又從而斷之曰。夷尹惠與孔子。其行事如此。皆古聖人也。然自我觀之。其聖亦有不同者。伯夷以節高天下。就其皜然粹白。無少點污。殆聖之清者也。伊尹以身肩天下。就其毅然擔當。無少退諉。殆

聖之任者也。柳下惠以量容天下。就其油然樂易。無少岸異。殆聖之和者也。至吾孔子則仕止久速。不倚一偏。變化推移。無所不可。清而未嘗不任。任而未嘗不和。如一元之運流。行不息。蓋聖之時者也。豈三子之所能及哉。夫孔子兼三聖之事。而爲一大聖之事。譬之於樂。其猶集衆音之小成。而爲一大成者乎。蓋樂有八音。獨奏一音。則一音自爲終始。而爲小成。若夫集大成也者。當衆音未作。則擊

鐃鐘以宣其聲。及衆音旣闋。則擊特磬以收其韻。金聲而玉振之也。蓋金玉二者衆音之綱紀。金不聲。則衆音無由始。自鐃鐘一舉。則衆音隨之俱起。是金聲也者。所以開衆樂之端。而始乎條理也。玉不振。則衆音無由終。自特磬一擊。則衆音由是俱止。是玉振也者。所以收衆音之節。而終乎條理也。始終之間。脉絡貫通。此樂之所謂集大成也。然則樂之始條理者。其卽孔子於羣聖之理。無不融會而

爲智之事乎。蓋時中之智其昭晰無所不開
固有然也。樂之終條理者其卽孔子於羣聖
之理無不全體而爲聖之事乎。蓋時中之聖
其凝成無所不收。固有然也。其知無不盡而
德無不全如此。此孔子所爲獨異於三子也。
夫聖智兼備。固孔子之所以集大成。而智以
成始。又以要終。則聖又由於智。不觀之射乎。
智之事可以合時。譬則射之巧。可以中的也。
聖之事可以詣極。譬則射之力。可以遠到也。

然必知之至。而後行之盡。有定見。乃有定力。猶自此至彼。以射於百步之外也。其引弓發矢。以至於侯者。是爾之力也。其直貫於的。而不失諸正鵠者。非爾之力也。巧也。蓋巧以運力。而後爲善射。智以成聖。而後爲全德。若孔子之巧力俱全。聖智兼備。信乎兼三聖之所不能兼。而吾之所願學者在是也。可見聖人之行。有偏全。皆因知有偏全。而致知之要在於窮理格物。苟本原一毫未徹。爲仁卽不免。

目録卷之三
偏於仁。爲義卽不免偏於義。有志聖人者。豈
可以生質之美。而不極學問之功哉。

北宮錡問曰。周室班爵祿也。如之何。孟子曰。其
詳不可得聞也。諸侯惡其害己也。而皆去其籍。
然而軻也。嘗聞其略也。天子一位。公一位。侯一
位。伯一位。子男同一位。凡五等也。君一位。卿一
位。大夫一位。上士一位。中士一位。下士一位。凡
六等。天子之制。地方千里。公侯皆方百里。伯七
十里。子男五十里。凡四等。不能五十里。不達於

天子附於諸侯曰附庸。天子之卿受地視侯。大夫受地視伯。元士受地視子男。

此一章書。是言周室班爵祿之大畧也。衛人北宮錡者。有感於戰國時之爵祿。皆非其舊。因而問曰。朝廷設官分職。統理內外。莫大於爵祿。而爵祿之制。莫備於成周。周室之初。其班爵祿之制。如之何。孟子曰。周家爵祿之班。其初制甚詳。今皆不可得而聞也。蓋因後世諸侯兼并僭竊。惡其所班之爵。妨害己之越。

分于名。惡其所班之祿。妨害己之侵占地。而皆去其載周制者之籍。是以無所考而知也。然而規模之建立。體統之昭垂。猶有幸存而未泯者。軻也。嘗聞其畧也。先以班爵言之。天下之大。統於一。其父天母地而爲天之子者。天子也。天子之貴。自爲一位。尊無二上矣。然天下非一人可獨理。於是衆建萬國。或爲同姓之親。或爲異姓之賢。與之共治焉。公一位。侯一位。伯一位。子與男同一位。自天子以

下。凡此五等。爵之通於天下。其截然而不可
紊如此。一國之中。統於尊。其出命正衆。爲國
人之擁戴者。君也。天子君於畿內。諸侯君於
列國。各自爲一位矣。然一國亦非一人可獨
理。於是分命庶官。或爲賢者而在位。或爲能
者而在職。與之共治焉。卿一位。大夫一位。上
士一位。中士一位。下士一位。自君以下。凡此
六等。爵之施於國中。其凜然而不可奸如此。
更以班祿言之。祿出於地。祿有厚薄。則地有

多寡。天子制地於畿內方千里。蓋其爵爲最尊。故其地爲最廣也。若夫公侯卑於天子。故制地皆方百里。伯又卑於公侯。故制地方七十里。子男又卑於伯。故制地方五十里。是祿之所班。凡有四等。四者之外。又有受地不足於五十里者。則祿予之入有限。而朝覲會同之費。不給。勢不能自達於天子。於是因大國之諸侯。而以姓名通於天子。謂之附庸。此班祿之制之通於天下者也。更以班祿之施於

王國者言之。其爲天子之卿。受地所出之祿。則視諸侯國之百里。大夫受地所出之祿。則視諸伯國之七十里。元士受地所出之祿。則視諸子男國之五十里。以王官之祿。比藩封之君。蓋以重內臣而尊天室也。

大國地方百里。君十卿祿。卿祿四大夫。大夫倍上士。上士倍中士。中士倍下士。下士與庶人在官者同祿。祿足以代其耕也。次國地方七十里。君十卿祿。卿祿三大夫。大夫倍上士。上士倍中

士。中士倍下士。下士與庶人在官者同祿。祿足以代其耕也。小國地方五十里。君十卿祿。卿祿二大夫。大夫倍上士。上士倍中士。中士倍下士。下士與庶人在官者同祿。祿足以代其耕也。耕者之所獲。一夫百畝。百畝之糞。上農夫食九人。上次食八人。中食七人。中次食六人。下食五人。庶人在官者。其祿以是爲差。

此四節書言列國班祿之差等也。孟子曰。以班祿之施於侯國者言之。公侯之國。則爲大

國其地方百里。而其卿大夫士之祿皆準諸其君以漸及。君十倍於卿祿。卿祿四倍於大夫。大夫倍於上士。上士倍於中士。中士倍於下士。而下士與庶人之爲府史胥徒在官供事者同焉。顧其祿之受於官者。惟取其足以代耕而已。蓋祿頒於上。或加數倍之入。而不嫌其豐。祿給於下。或準一夫之田。而不病其嗇。尊卑有序。厚薄適宜如此。其於次國亦然。伯爲次國。其地方七十里。而其卿大夫士之

日知錄卷之三十一
十一
祿亦準諸其君以漸及。君十倍於卿祿。卿祿則三倍於大夫。大夫倍於上士。上士倍於中士。中士倍於下士。而下士之祿則又與庶人之爲府史胥徒在官供事者同焉。顧其祿之受於官者亦惟取其足以代耕而已。其於小國亦然。子男爲小國。其地方五十里。而其君與卿大夫士之祿或隆或殺亦各有一定之制。如君之祿固十倍於卿。而卿之祿猶得二倍於大夫。至於大夫則惟倍上士。上士則惟

倍中士。中士則惟倍下士。下士則與庶人在官服役者同其所受之祿焉。要之受祿於官亦取其足以代耕而已。合而言之。由卿而上三等之國異。蓋祿寢厚而不殺。則地必不足以供。大夫而下三等之國同。蓋祿寢薄而復殺。則臣不能以自給。此周制所爲善也。然庶人代耕之義。豈盡同於下士而無其等哉。觀耕者所得之田。每夫各受百畝。百畝之田。各宜加糞。糞多而力勤者。上農夫也。計其所獲。

可食九人。降而上次。其所獲可食八人。降而中農。其所獲可食七人。降而中次。其所獲可食六人。又降而爲下農。其所獲可食五人。蓋力漸以惰。所獲漸以輕。所食亦漸以寡。若夫庶人在官者。事有繁簡。力有勞逸。故其受祿多寡。大約以農夫所獲之多寡爲差等焉。所謂祿足以代其耕者如此。夫列爵有尊卑。而內外殊其制。班祿有多寡。而上下異其規。周制之初如此。奈何諸侯惡其害己之兼并僭

竊而去其籍哉。幸而孟子猶能述其大畧。所以後世得考王制之規模者。賴有此篇之存也。

萬章問曰。敢問友。孟子曰。不挾長。不挾貴。不挾兄弟而友。友也者。友其德也。不可以有挾也。孟獻子。百乘之家也。有友五人焉。樂正裘。牧仲。其三人則予忘之矣。獻子之與此五人者。友也。無獻子之家者也。此五人者。亦有獻子之家。則不與之友矣。非惟百乘之家爲然也。雖小國之君。

亦有之。費惠公曰。吾於子思。則師之矣。吾於顏般。則友之矣。王順長息。則事我者也。非惟小國之君爲然也。雖大國之君亦有之。晉平公之於亥唐也。入云則入。坐云則坐。食云則食。雖疏食菜羹。未嘗不飽。蓋不敢不飽也。然終於此而已矣。弗與共天位也。弗與治天職也。弗與食天祿也。士之尊賢者也。非王公之尊賢也。舜尚見帝。帝館甥于貳室。亦饗舜。迭爲賓主。是天子而友匹夫也。用下敬上。謂之貴貴。用上敬下。謂之尊

賢。貴。貴。尊。賢。其。義。一。也。

此一章書是因論友道而見貴貴尊賢有交相爲重之理也。萬章問曰。朋友五倫之一。人未有不藉友以相成者。敢問其道爲何如。孟子曰。交友之道。在忘勢。分畧形迹。去驕人矜己之念而已。如己雖長。不敢挾其長。以加於少者。而與之友。己雖貴。不敢挾其貴。以加於賤者。而與之友。己雖有兄弟之貴盛。不敢挾其有兄弟。以加於寡弱者。而與之友。蓋友也。

者所以友其德。以爲我進脩之助也。一有所挾。則其心必不虛。而其意必不誠。有德者不爲我友。何以成我之德。故斷斷乎不可以有挾也。然三者之中。惟不挾貴最難。而求諸古人。則有可歷舉者。昔魯有世卿孟獻子。百乘之家也。有友五人焉。一曰樂正裘。一曰牧仲。其餘三人之姓名。則予忘之矣。夫獻子之與此五人友者。爲何良。以此五人者。皆自高其德。而視獻子之家。無一毫歆羨之心者也。是

以獻子與之爲友。若此五人者。或有獻子之家。而不能忘其有位之勢。則獻子必輕之。不與之爲友矣。况冑自挾以友人乎。是獻子之不挾貴如此。進而觀之。非惟百乘之家爲然也。雖小國之君。亦有之。費邑惠公嘗曰。吾於子思之大賢德。可以儀型者。則以師禮事之矣。吾於顏般之次賢德。可以切磋者。則以友道交之矣。若夫王順長息。則事我之人也。吾敢以事我者。而置之師友之列哉。觀惠公之

言其不挾貴又如此。更進而觀之。非惟小國之君爲然也。雖大國之君亦有之。晉平公之於亥唐也。嘗慕其德而造其廬。當入門之時。不遽入也。必唐云入。公則入。當坐之時。不遽坐也。必唐云坐。公則坐。當食之時。不遽食也。必唐云食。公則食。其所食者。雖蔬食菜羹之薄。未嘗不飽。蓋敬賢者之命。不敢不飽也。然惜乎終於此而已矣。至於天位之所以官賢者。公弗與之共也。天職之所以任賢者。公弗

與之治也。天祿之所以養賢者。公弗與之食也。三者皆王公所有。不能推以與之。而但唯諾承順。此爲士無爵土者之尊賢也。非王公操爵賞者之尊賢也。則亦止可謂之不挾貴而已。更進而上之。則又有堯之於舜。昔者舜自側陋。上見帝堯。堯妻之以二女。以舜爲甥。而館之於貳室。亦嘗就舜之館而饗舜之食。其館甥也。舜爲賓。堯爲主。其饗舜也。堯爲賓。舜爲主。脫君臣之分。更爲賓主之交。是以天

子之貴。友匹夫之微者也。此其不挾爲何如。是則友道之極也。然所以如此者。豈徒以貴下賤。過自貶損。而不顧義之可否哉。天下有一定之名位。卽有獨隆之道德。用下而敬上。謂其名位之一定。貴在彼而吾貴之。是貴貴也。用上而敬下。謂其道德之獨隆。賢在彼而吾尊之。是尊賢也。二者事雖不同。而理各有當。貴貴以尊君。下敬上而非諂。尊賢以尚德。上敬下而非詘。位非獨重。德非獨輕。皆義當。

如是而已。夫既同出於義。而可挾貴以待天下之士哉。按此章因論朋友。而遂及君臣。取友之益。止乎一身。用人之功。及於天下。則君臣爲尤重。孟子見戰國之君。繆爲恭敬。而不肯行其道。故言用賢之道。當與共天位。治天職。食天祿。不僅禮貌之末而已。其實人君若待之非禮。則賢者先自引避。雖欲用之。而無由。聖帝明王。未有不虛心折節。樂道忘勢。而可以得賢致治者。故曰。師臣者王。賓臣者霸。

萬章問曰。敢問交際何心也。孟子曰。恭也。曰。卻之卻之爲不恭。何哉。曰。尊者賜之。曰其所取之者。義乎不義乎。而後受之。以是爲不恭。故弗卻也。曰。請無以辭卻之。以心卻之。曰。其取諸民之不義也。而以他辭無受。不可乎。曰。其交也以道。其接也以禮。斯孔子受之矣。萬章曰。今有禦人於國門之外者。其交也以道。其餽也以禮。斯可受禦與。曰。不可。康誥曰。殺越人于貨。閔不畏死。凡民罔不讖。是不待教而誅者也。殷受夏。周受

殷所不辭也。於今爲烈。如之何其受之。

此一章書。是論交際有可受之義。折衷之聖人而論定也。萬章問曰。吾人處世。酬酢萬事。皆本於心。敢問人以禮儀幣帛相交接者。此何心也。孟子曰。有所敬於內。而後有所將於外。交際之舉。彼此相敬。主於恭而已。萬章曰。交際固爲恭矣。然辭受亦所以明禮。乃或有卻之而不受者。人遂以爲不恭。何哉。孟子曰。凡處人之餽。未有無故而卻者。如尊者有賜。

於我乃必竊計其從來曰彼其所取之物以
餽我者果義乎抑不義乎必合於義而後受
否則弗受是未免有刻薄之意鄙其物而輕
其人非所以待尊者之道也以是卽爲不恭
故直受而弗卻也萬章曰尊者之賜固不可
卻而不義之物終不可受於此有善處之術
當餽之來請無以言辭顯然卻之但以心測
度之曰此乃不義而取諸民者無可受之理
姑託他辭以無受則在我無不義之汚在彼

無不恭之嫌。不亦可乎。孟子曰。辭卻固失之
徑直。心卻尤失之詭譎。亦顧其交接何如耳。
假使其交也以道。而非出於無名。其接也以
禮。而不失之苟簡。雖孔子爲禮道之宗主。亦
受之矣。何以卻爲。萬章曰。若不問其物之所
從來。而但觀其交際之禮。設有禦止人於國
門之外。而取其物者。卽以禦得之物與人。其
交也以道。其餽也以禮。斯亦可受與。孟子曰。
烏乎可。康誥之書有曰。殺其人矣。而復顛越

其人之尸。於以奪其貨。閔然蚩頑。不知畏死。凡民罔不怨讎。是不待教戒而卽誅者也。國之有法。殷受於夏。周受於殷。莫不皆然。至今猶烈烈光顯。是禦得之貨。如此其有罪也。亦安得以交道接禮而槩論哉。如之何其受之乎。苟非然者。亦不必苛責其所從來而堅卻之矣。

曰。今之諸侯。取之於民也。猶禦也。苟善其禮際矣。斯君子受之。敢問何說也。曰。子以爲有王者

作。將比今之諸侯而誅之乎。其教之不改而後誅之乎。夫謂非其有而取之者盜也。充類至義之盡也。孔子之仕於魯也。魯人獵較。孔子亦獵較。獵較猶可。而况受其賜乎。曰。然則孔子之仕也。非事道與。曰。事道也。事道奚獵較也。曰。孔子先簿正祭器。不以四方之食供簿正。曰。奚不去也。曰。爲之兆也。兆足以行矣。而不行而後去。是以未嘗有所終三年淹也。孔子有見行可之仕。有際可之仕。有公養之仕。於季桓子。見行可之

仕也。於衛靈公。際可之仕也。於衛孝公。公養之仕也。

此三節書是因言交際而論孔子之出處。見聖人未嘗絕物也。萬章曰。禦得之貨不可受。明矣。然則今之諸侯。虐取於民。其不義也。亦猶禦得者也。苟善其禮以交際矣。斯君子不問其可否而受之。敢問何說也。孟子曰。今之諸侯。取民固多不義。然以法繩之。未卽至於禦人之盜也。子以爲有王者起。明罰勅法。將

盡今之諸侯而誅之乎。抑待教之不改而後誅之乎。必教之不改而後誅。則與禦人不待教而誅者。自不同矣。夫禦得之貨。與取非其有。雖同一不義。然必禦人乃爲真盜。至謂取非其有爲盜者。乃推其類以造於義之極至耳。非便以爲真也。且天下固有不可過求而不嫌從俗者。不觀諸孔子乎。當其仕於魯也。魯人田獵較奪禽獸以祭。孔子亦姑從俗獵較而不之禁。夫獵較亦取物之非禮者。尚可

以從。而況諸侯之交接。何遂爲不可受乎。萬章曰。君子之仕。將以道易俗。今孔子從魯之俗如此。則其仕於魯也。固非以行道爲事與。孟子曰。孔子身任行道之責。行道之外。更有何事。乃事道也。萬章曰。旣以行道爲事。則獵較非道。宜有以禁之。而乃從其俗。何也。孟子曰。以道易俗。固自有漸。彼獵較供祭。所以不止者。由其器無常數。實無常品。故孔子但先以簿書正其祭器。使器有定數。不以四方難

繼之物供其簿中之所正。則實有常品。獵較所得之物雖多。亦無所用。將久之而自廢矣。此固聖人轉移之妙用也。安可謂之非道乎。萬章曰。孔子既不能革弊。乃委曲遷就如此。是道已難行矣。奚不決於去也。孟子曰。孔子非難於去也。但世方望我以行道。而更張太驟。未免生人疑畏之心。所以不去者。蓋欲小試以示人。使知吾道之易行。然後可以次第施焉。而吾道大行之兆。亦卽於此卜之耳。若

夫兆既可行。而人卒不能行其道。然後不得已而去。蓋其去雖不輕。而志未嘗不決。是以未嘗終三年之久。淹畱於一國也。且孔子行道之心。不但於仕曾見之。吾歷觀其出處之跡。大槩有三。有見其道有可行之機而仕者。有因其君能接遇以禮而仕者。又有因其君有養賢之典而仕者。於稽其實。於季桓子執政之時。君用之於上。相薦之於下。乃從而仕。是見行可之仕也。於衛靈公之郊。迎致粟。乃

從而仕。是際可之仕也。於衛孝公之餽。問有禮。乃從而仕。是公養之仕也。夫孔子爲道自重。不肖苟且。然苟可以仕。不必明君賢相。而亦就之。況今諸侯之交際。猶知賢者之當重。奈何不爲行道之計。而重絕之耶。可見聖賢辭受出處。固不徇俗爲同。亦不矯俗爲異。然非意必固我之盡忘。而仕止久速之合節者。亦豈可自託於孔孟。而漫無擇於其間哉。

孟子曰。仕非爲貧也。而有時乎爲貧。娶妻非爲

養也。而有時乎爲養。爲貧者辭尊居卑。辭富居貧。辭尊居卑。辭富居貧。惡乎宜乎。抱關擊柝。孔子嘗爲委吏矣。曰。會計當而已矣。嘗爲乘田矣。曰。牛羊茁壯長而已矣。位卑而言高。罪也。立乎人之本朝。而道不行。恥也。

此一章書。是言仕者各有當盡之道也。孟子曰。君子之仕也。將以致用於時。而有裨君民之大。非爲貧之故也。然亦有道與時違。家貧親老。而資其祿以仕者。猶人娶妻。本以繼嗣。

非爲養之故也。然亦有不能親操井臼而資其養以娶者。要皆不得已而然也。夫君子之仕。本以爲道。至不得已而爲貧。則其位祿之所居者。可無審擇於其間哉。必也辭其位之尊者而居其卑。附一命之末足矣。辭其祿之富者而居其貧。叨升斗之糈足矣。如此而後爲爲貧之仕也。辭尊而居卑。辭富而居貧。將以何者爲宜乎。蓋爲貧之仕。雖不爲道。而亦不可以苟祿。其惟守關之役。譏防出入。以擊

析爲事者。庶易稱其職而可居也。試觀孔子。亦嘗爲倉廩委積之吏矣。必曰吾司錢穀者也。出納之數不可不明。惟求其會計當而已矣。又爲苑囿芻牧之吏矣。必曰吾司畜養者也。孳息之物不可不蕃。惟求其牛羊茁然肥壯長大而已矣。觀孔子之言如此。可見爲貧而仕。官卑祿薄。惟取其易稱職而已。蓋人之所處。莫不各有其當爲。居微末之位。則國家之責任輕。苟不安其分而越職妄言。高論朝

事非惟無益。適以取禍。出位之罪。莫能追矣。若夫立乎人之本朝。居尊富之地。有行道之責。此豈一官一職之比哉。而乃依阿。渙。恣。側。足。取。容。上。無。以。裨。益。君。德。下。無。以。康。濟。斯。民。道之所在。得行而不行。亦可恥之甚也。夫以越位爲罪。則見卑貧無行道之責。以廢道爲恥。則見尊富非竊祿之官。仕者於此。亦可以自審矣。雖然。立人之本朝。位高祿厚。有當行之道者。尤宜取孟氏之言而深思之也。與。

萬章曰。士之不託諸侯。何也。孟子曰。不敢也。諸侯失國而後託於諸侯。禮也。士之託於諸侯。非禮也。萬章曰。君餽之粟。則受之乎。曰。受之。受之何義也。曰。君之於氓也。固周之。曰。周之則受。賜之則不受。何也。曰。不敢也。曰。敢問其不敢何也。曰。抱關擊柝者。皆有常職。以食於上。無常職而賜於上者。以爲不恭也。曰。君餽之。則受之。不識可常繼乎。曰。繆公之於子思也。亟問。亟餽鼎肉。子思不悅。於卒也。標使者出諸大門之外。北面。

稽首再拜而不受。曰。今而後知君之犬馬畜伋。蓋自是臺無餽也。悅賢不能舉。又不能養也。可謂悅賢乎。

此一章書。是明士之自處。與君之待士。當各盡其道也。萬章曰。士當未仕時。無以自食。藉諸侯之祿。以爲養。宜若可爲者。乃不冒託於諸侯。何也。孟子曰。士之分不敢託於諸侯也。蓋諸侯本有爵土。不幸失國出奔。而後託於諸侯。以食其廩餼。此在古寄公之禮也。若士

無爵士。不得比於諸侯。苟託於諸侯而食祿。是以一介之士。擬邦君之尊。非禮之當然也。萬章曰。士之不託諸侯。固矣。若君餽之粟。則亦受之乎。孟子曰。君餽之粟。如之何不受也。萬章曰。託之則不可。餽之則受。不識受之爲何義也。孟子曰。君之於民。固有周恤之義。士而未仕。無異於編氓。是以可受也。萬章曰。周與賜皆出於君。今周之粟則受。賜之祿則不受。何也。孟子曰。士之不敢受賜。卽不敢託於

諸侯之意。分定故也。萬章曰。敢問其不敢受
賜何也。孟子曰。周無常數。此君待民之禮。無
常職者皆可受。賜有常數。此君待臣之禮。無
常職者不敢受。故雖抱關擊柝之吏。至爲卑
小。皆有常職。以食其常賜於上。若士未爲臣。
無常職也。而食常賜於上。是不居臣之職而
受臣之食。故以爲不恭而不受也。萬章曰。君
餽之。則士受之。不識所餽者可常繼續否乎。
孟子曰。士之自處固安其分之宜。而君之待

士則自有養賢之禮。昔者魯繆公之於子思也。悅其賢也。亟命使者問其安否。又亟命使者餽以鼎肉。自以爲能養賢矣。但數以君命來餽。反使賢者有數拜之勞。故子思惡其褻也。不悅於心。於其卒之復來餽。乃麾使出諸大門之外。北面稽首再拜而辭其餽。曰。向之君命來餽。吾意君以禮賢也。今而後始知君之愛而不敬。特以犬馬畜伋爾。蓋自是繆公悔悟。不復令臺官來餽也。夫悅賢所重在舉。

不徒在養。今繆公之悅賢。既不能舉而用之。又以屑屑問餽之故。不能養賢。尚可謂之悅賢乎。然則國君之所以待士者可知矣。

曰。敢問國君欲養君子。如何斯可謂養矣。曰。以君命將之。再拜稽首而受。其後廩人繼粟。庖人繼肉。不以君命將之。子思以爲鼎肉。使己僕僕爾亟拜也。非養君子之道也。堯之於舜也。使其子九男事之。二女女焉。百官牛羊倉廩備以養舜於畎畝之中。後舉而加諸上位。故曰。王公之

尊賢者也。

此二節書見能養能舉而後盡悅賢之道也。萬章曰。國君養君子。亟餽既不可。無餽又不。可。敢問如何。斯可謂之能養矣。孟子曰。國君欲養君子。不以君命則簡。常以君命則瀆。故始而餽粟餽肉。以君命將之。表其誠敬。賢者再拜稽首而受。以重其命。其後使司粟之廩人。繼送其粟。司肉之庖人。繼送其肉。不復以君命將之。不使其有亟拜之勞。此固國君養

君子之道也。若子思之所以不悅者。以爲君之所餽。不過一鼎肉耳。乃數以君命來致。使己僕僕然拜賜之不暇。非養君子之道也。此所以麾而不受也。然國君之悅賢。不貴其能。養而貴其能尊。昔者堯之於舜。知其有非常之德。因待以非常之禮。始則使其子九男事之以聽其外治。二女女焉以聽其內治。且有百官以供其使命。有牛羊以待其膳羞。有倉廩以給其饗飧。無一不備。以養舜於畎畝之

中。則繼粟繼肉不足言矣。後又舉而加諸上相之位。如此其隆也。能養能舉悅賢之道盡矣。故曰。必如此乃王公之尊賢者也。今天下無真能悅賢者。故士亦以禮自待耳。寧敢託焉以苟祿乎。按孟子在當時傳食諸侯。國君能養者不乏。然其志在行道。不可以口腹虛拘。故每惓惓以能舉爲言。惜乎當世終莫之用也。

萬章曰。敢問不見諸侯何義也。孟子曰。在國曰

市井之臣在野曰草莽之臣皆謂庶人庶人不傳質爲臣不敢見於諸侯禮也萬章曰庶人召之役則往役君欲見之召之則不往見之何也曰往役義也往見不義也且君之欲見之也何爲也哉曰爲其多聞也爲其賢也曰爲其多聞也則天子不召師而况諸侯乎爲其賢也則吾未聞欲見賢而召之也繆公亟見於子思曰古千乘之國以友士何如子思不悅曰古之人有言曰事之云乎豈曰友之云乎子思之不悅也

豈不曰。以位。則子君也。我臣也。何敢與君友也。
以德。則子事我者也。奚可以與我友。千乘之君。
求與之友。而不可得也。而況可召與。

此一章書。是言不見諸侯之義也。萬章問曰。
士以用世爲心。則以得君爲念。乃高尚其志。
不見諸侯。敢問何義也。孟子曰。士之不見諸
侯。非自尊大。分有所不可耳。自其在國都而
言。曰市井之臣。自其在郊野而言。曰草莽之
臣。二者皆謂之庶人。庶人不曾傳質爲臣。與

執贄在位者不同。故守爲下之分。不敢見於諸侯。禮也。萬章曰。士旣與庶人等。乃君召庶人而役之。則往應其役。君召士而欲見之。則不肖往見。何也。孟子曰。士與庶人。語分則不同。異。語道則有異。爲庶人者。往應其役。以卑承尊。義當然也。若爲士者。欲以道而見用。必以道而自重。倘召之而卽往。則枉道以徇人。守己之義。不如是也。惟義有可有不可。故士有往有不往耳。且欲知士不可往見之義。當先

知君欲見士之心。子試言君之汲汲然欲見士者。何爲也哉。萬章曰。夫君之欲見士者。爲其多聞。可爲考德問業之資。爲其賢。可爲正君善俗之助也。孟子曰。旣爲其多聞。必眞知己之不足。而奉之爲師矣。旣以爲師。則雖天子之貴。猶不敢召師。而況諸侯乎。旣爲其賢。便當折節下士。而就見之。則吾未聞欲見賢而反召之者也。何以見君之不可召士。昔者魯繆公慕子思之賢。亟見於子思。曰。古有撫

千乘之國。下友一介之士。此其君爲何如。繆公之意。蓋視千乘爲甚重。而以友士爲盛節矣。子思以其心有所挾而不悅。曰。古之人有言。人君於士。當師事之。豈但如君所言友之云乎。吾想子思之不悅也。豈不曰。君之於士。論德不論位。以位而言。則子君之尊也。我臣之卑也。尊卑自有定分。何敢與君友也。若以德而言。則子當以師道事我。乃可爲受益者也。奚可以與我友。此子思之意也。夫以千乘

之君求與一介之士爲友而且不可得况欲
召之往見哉。

齊景公田招虞人以旌不至將殺之志士不忘
在溝壑勇士不忘喪其元孔子奚取焉取非其
招不往也曰敢問招虞人何以曰以皮冠庶人
以旃士以旂大夫以旌以大夫之招招虞人虞
人死不敢往以士之招招庶人庶人豈敢往哉
况乎以不賢人之招招賢人乎欲見賢人而不
以其道猶欲其入而閉之門也夫義路也禮門

也。惟君子能由是路。出入是門也。詩云。周道如底。其直如矢。君子所履。小人所視。萬章曰。孔子君命召。不俟駕而行。然則孔子非與。曰。孔子當仕有官職。而以其官召之也。

此五節書皆申明士不可召之意。孟子曰。君不可以召士。不但徵諸子思之言。更以齊景公招虞人事觀之。昔齊景公出而田獵。招虞人以旌。虞人不至。景公將殺之。孔子聞而美之。曰。志士固窮。不忘死在溝壑。勇士輕生。不

忘喪其元首。若虞人者。可以當之矣。孔子奚
取於虞人而美之。若是。取非其招而守死。不
往也。豈士之智。反出虞人下哉。萬章曰。旌固
非所以招虞人。敢問招虞人。當用何物。孟子
曰。以皮冠。以其本爲虞人之所有事也。若招
庶人。則以旃。蓋通帛爲旃。質素無文。猶庶人
之無文采也。士以旂。蓋交龍爲旂。象其有變
化之意也。惟招大夫。則以旌。蓋析羽而注於
旂干之首。以象其有文明之意也。各有其義。

如此。今景公以旌招虞人。是以大夫之招而招虞人。虞人且守死不敢往。卽此推之。以招士之旂而招庶人。庶人亦豈敢往哉。夫以貴者之物而招賤者。猶爲寵異之。特以招非其物而不欲往。况乎召使往見。此招不賢人之招也。以不賢人之招招賢人。則失禮而辱士甚矣。其肯往乎。此士不見諸侯之義也。然則國君欲見賢人。近則就見。遠則幣聘。必以其道而後可。使以不賢人之招招之。則是欲見

賢人而不以其道。猶欲其入而閉之門。適以拒其入也。賢何由而得見乎。所以然者。以士有禮義之當守也。夫義者。事之宜。一措足而不容離。如路之平正通達也。禮者。心之制。一措躬而不可越。如門之謹嚴端直也。是人人之所共由。而同其出入者也。但衆人每多苟且。惟君子見之明。守之定。而獨能由是路。出入是門也。小雅大東之詩曰。瞻彼周道。其平坦如砥。其端直如矢。是在上之君子。所爲率

履在下之小人。所爲視效者也。由詩言觀之。而君子之能由是路。出入是門。固可知已。若往應不賢人之招。則是由非義之路。出入非禮之門。君子豈爲之哉。此欲見賢人者。必當以其道也。萬章曰。君子秉禮守義。固不往見。如孔子聞君命召。卽不俟駕而行。然則孔子之往見非與。孟子曰。是何得輕議孔子哉。孔子所以不俟駕者。以其當仕而有官職之事。而君亦以其官召之也。若未有官職。則市井

草莽之臣耳。豈得藉口於孔子。遂輕身而往哉。蓋臣有相臨之分。分之所在。雖孔子不敢違。士有自守之節。節之所在。雖虞人不可屈。卽同一爲臣。亦自有辨。或爵位高卑之不同。或流品清濁之殊異。人君待之各以其禮。而使之各盡其道。則體統隆於上。而廉恥勵於下矣。

孟子謂萬章曰。一鄉之善士。斯友一鄉之善士。一國之善士。斯友一國之善士。天下之善士。斯

友天下之善士。以友天下之善士爲未足。又尚論古之人。頌其詩。讀其書。不知其人可乎。是以論其世也。是尚友也。

此一章書。是言取善之道無窮。在己不可以自足也。孟子謂萬章曰。君子取善之道。固當博資於人。尤必審度於己。假如我之善行在一鄉。卓然爲一鄉之善士。然後一鄉之有善者。我皆得而友之。而一鄉之善。莫非我善矣。進而在一國。卓然爲一國之善士。然後一國

之有善者。我皆得而友之。而一國之善。莫非
我善矣。又進而在天下。卓然爲天下之善士。
然後天下之有善者。我皆得而友之。而天下
之善。莫非我善矣。夫至於友天下之善士。則
固通天下於一身。而取善之量。亦已廣矣。乃
其心猶以爲未足。又進而考論乎千百世之
上。稽古帝王聖賢之爲人。於其詩則頌之。於
其書則讀之。然頌詩讀書。而不知其爲人之
實。則亦口耳之資而已。烏乎可。又必緣其世

代之升降。考其行事之異同。帝所以爲帝王。所以爲王。聖所以爲聖。賢所以爲賢。恍如身履其地。親炙其風。晤對一堂之上。而古人之嘉言懿行。皆我進脩之藉矣。謂之尚友。不亦宜乎。蓋至於尚友。而後取善之量始造其極也已。可見學問之道。今人與居。又必古人與處。論其世。豈徒欲知其人哉。見唐虞之成天。平地。君便思爲堯舜。臣便思爲臯夔。見三代之長治久安。君便思爲禹湯文武。臣便思爲

益尹旦奭。上下交脩。孜孜不怠。如此則德必日進。治必日隆。而古今人無不相及之嘆矣。齊宣王問卿。孟子曰。王何卿之問也。王曰。卿不同乎。曰。不同。有貴戚之卿。有異姓之卿。王曰。請問貴戚之卿。曰。君有大過則諫。反覆之而不聽。則易位。王勃然變乎色。曰。王勿異也。王問臣。臣不敢不以正對。王色定。然後請問異姓之卿。曰。君有過則諫。反覆之而不聽。則去。

此一章書是論古大臣之義守經行權各有

不同也。齊宣王問爲卿之道於孟子。孟子曰。王何卿之間也。齊王曰。名之爲卿。均係重臣。亦有不同者乎。孟子曰。不同。有從同姓之中。登用而爲貴戚之卿者。有從疎逖之中。登用而爲異姓之卿者。齊王曰。請先問貴戚之卿。孟子曰。貴戚之卿。與國家有親親之恩誼。共安危。同休戚。若遇君有大過。可以爲宗社憂者。則亟亟焉盡言以諫之。諫之而聽。固社稷蒼生之福也。萬一不幸。反覆諫之而終於不

聽則不忍坐視其亡。而必更立本宗之有賢德者以代之。所以存祖宗之統於勿墜。不得已而爲之也。是則貴戚之卿達權救變之義如此。齊王聞易位之言。駭其太過。不覺勃然變乎色。於是孟子告之曰。王勿異臣言也。王問臣。臣謹據古制以對。若忌諱而不言。則不正矣。臣豈敢哉。齊王色定。然後請問異姓之卿。孟子曰。異姓之卿與貴戚之卿異。一遇君之有過。可以爲宗社憂者。亦亟亟焉盡言以

諫之。若不幸而反覆盡言。終於不聽。則忠議
讜論。置之無用之地。上無受善之誠。斯下無
可仕之義。安肯貪戀爵祿。而久居其國哉。惟
有奉身而退。以潔然遠去耳。是則異姓之卿
合則留。不合則去之義如此。大抵孟子所言
之卿。雖不同。其忠君之心則一。人主誠知人
臣進諫。本由忠愛。而虛懷嘉納。從善弗拂。則
君臣有始終之美。而令問昭於無窮。此魏徵
之告太宗。所以願爲良臣。不願爲忠臣也。

日講四書解義卷之二十二

日講四書解義卷之二十三

孟子

下之五

告子章句上

告子曰。性猶杞柳也。義猶桮棬也。以人性爲仁義。猶以杞柳爲桮棬。孟子曰。子能順杞柳之性。而以爲桮棬乎。將戕賊杞柳。而後以爲桮棬也。如將戕賊杞柳。而以爲桮棬。則亦將戕賊人以爲仁義與。率天下之人而禍仁義者。必子之言夫。

此一章書是辯異端性惡之說也。告子不知性而妄言曰。今之言性者。必言仁義。此豈性之本然者哉。自吾觀之。人之生而有性。猶杞柳之質。一物之蠢然者也。人之行事而有仁義。猶桮棬之器。必有待而成也。人性本無仁義之名。以人性而強爲仁義。猶杞柳本無桮棬之形。乃以杞柳而強爲桮棬。皆人力使然而已。孟子曰。杞柳本非桮棬。固矣。但子謂以杞柳爲桮棬。其能順杞柳之性。不待矯揉造

作而遂自然以爲栝樅乎。必將斬伐之。屈抑之。戕賊杞柳之本然。矯揉造作。而後以爲栝樅也。如將戕賊杞柳而後以爲栝樅。則亦將戕賊人之性以爲仁義與。此言一出。人皆曰。仁義非有利於性。而實有害於性。於是相與棄仁滅義而不爲。是率天下之人。以歸於不仁不義。而爲仁義之禍者。必由子之言也夫。蓋仁義卽是人性。故事父卽知孝。事君卽知忠。無有一毫勉強。其有不忠不孝者。乃是氣

質錮蔽而昧其本來爾。告子論性。誤認有生以後之氣質。而不知降衷以來之本體。此說一行。人既以仁義爲性外之物。亦將視君父爲性外之人。毀忠滅孝。廢倫叛紀。何所不至。其害可勝道哉。孟子所以亟闢之也。

告子曰。性猶湍水也。決諸東方則東流。決諸西方則西流。人性之無分於善不善也。猶水之無分於東西也。孟子曰。水信無分於東西。無分於上下乎。人性之善也。猶水之就下也。人無有不

善。水無有不下。今夫水搏而躍之。可使過顙。激而行之。可使在山。是豈水之性哉。其勢則然也。人之可使爲不善。其性亦猶是也。

此一章書。是辯異端性善惡混之說也。告子以杞柳喻性。旣爲孟子所闢。復遁其說曰。人性無一定之體。取而譬之。猶湍水之爲物。決流。潏洄。而未有所之也。但決諸東方。則從而東流。決諸西方。則從而西流。人性之無分於善不善。顧其所習何如。猶水之無分於東西。

顧其所決何如耳。性無定體。水無定向。一而已矣。孟子曰。子以水喻性。不若卽以水性喻人性之爲切。夫決東則東流。決西則西流。水信無分於東西矣。然豈無分於上下乎。其可決之而使東者。必東之下。其可決之而使西者。必西之下也。人性之原於天者。本渾然而至善。猶水之流於地者。本沛然而就下也。旣名曰水。一定皆善。決無有不善。旣名曰水。一定就下。決無有不下。蓋性有定體。水有定向。

乃理之必然者也。然人性皆善。而或有不善者。何哉。蓋有其故爾。今夫水性本下也。或搏擊而躍起之。可使上而過顙。或壅激而逆行之。可使上而在山。豈水之性不下哉。搏激之勢使然也。然則人性本善。而有時可使爲不善者。豈人性本然哉。特爲物欲所溺。亦猶水爲搏激所使也。奈何因人之習爲不善。而遂謂性無定體也哉。按朱熹言性本善。故順之而無不善。性本無惡。故反之而後爲惡。詮孟

子之義極明邪說不攻自破矣。人主知此以立教出治順其本性而不反其本性。天下之人孰不勉於善而去不善也哉。

告子曰。生之謂性。孟子曰。生之謂性也。猶白之謂白與。曰。然。白羽之白也。猶白雪之白。白雪之白。猶白玉之白與。曰。然。然則犬之性。猶牛之性。牛之性。猶人之性與。

此一章書是辨異端以氣爲性之說也。告子又曰。人有此生。斯有此性。性之在人。與生俱

生。若舍所謂知覺運動者。豈別有性哉。蓋告子前後論性不一。其大意總不出於此。孟子從而詰之曰。子以凡有生者。卽謂之性。猶如凡物之白者。皆謂之白。更無差別。與。告子答曰。然。孟子復詰之曰。白之在物者。有羽有雪。有玉而色則無異也。今子以白之謂白。是不原其物之異。而惟論其色之同。將謂白羽之白也。猶白雪之白。而無所異。白雪之白。猶白玉之白。而無所異與。告子又答曰。然。觀告子

之言。則是謂凡有生者。同是一性矣。孟子因折之曰。子謂凡物之白者。皆謂之白。則是凡人物之生者。皆謂之性。然則犬牛與人。皆有知覺運動。子將謂犬猶夫牛。牛猶夫人。而其性一無差別與。吾知生則人物所同。性則人物各異。人與物。雖同得乎天之氣。以爲生。而實各得乎天之理。以爲性。此所以人無不善。而爲萬物之靈也。子安得混而爲一哉。按書言惟皇上帝。降衷於下民。春秋傳言民受天

地之中以生。所謂性者。卽此渾然同具之理。至於所稟之氣。則清濁厚薄。萬有各別。豈獨物與人迥然不類。卽人之中。聖賢庸愚。亦有不可強齊者。告子不知理一分殊之義。而誤以氣爲性。所以其說愈變而愈謬也。

告子曰。食色性也。仁內也。非外也。義外也。非內也。孟子曰。何以謂仁內義外也。曰。彼長而我長之。非有長於我也。猶彼白而我白之。從其白於外也。故謂之外也。曰。異於白馬之白也。無以異。

於白人之白也。不識長馬之長也。無以異於長人之長與。且謂長者義乎。長之者義乎。曰。吾弟則愛之。秦人之弟則不愛也。是以我爲悅者也。故謂之內。長楚人之長。亦長吾之長。是以長爲悅者也。故謂之外也。曰。耆秦人之炙。無以異於耆吾炙。夫物則亦有然者也。然則耆炙亦有外與。

此一章書是辨異端義外之說也。告子終以知覺運動爲性。因復言曰。人之於食卽知甘。

於色卽知悅皆生而能然者也。性也。卽其甘之悅之之心生於內。可見凡仁愛之心是由衷而出者。內也。非外也。可甘可悅之宜由於外。可見凡事物之宜。是因感使然。外也。非內也。然則學者但當用力於仁。而何必強求合於義也哉。孟子曰。仁義一理。皆吾性所固有。子何故以仁爲內而義爲外乎。告子曰。我謂義外。固自有說。如彼人年長而稱之爲長。不過因其長而長之。非我先有長之之心。猶彼

人色白而我稱之爲白。不過從其白於外。而非我先有白之之心也。由此觀之。長不由乎我。而由乎人。事物之宜。果在外矣。我所以言義外也。孟子因其喻而辨之曰。子以白喻長。實非其倫。蓋白無不同。長則有不同。如白馬之白。無異於白人之白。固已。至若長馬之長。不過口稱其長。若長人之長。則必有恭敬之心。而與長馬不同。不識長馬之長也。竟無異於長人之長與。卽此長人不同於長馬。必由

吾心之制。乃所謂義也。且子所謂義者。果以
彼年長於我。而以長者爲義乎。抑因彼之長。
而吾有恭敬之心。以長之者爲義乎。如以長
者爲義。則敬由乎人。義誠在外。如以長之者
爲義。則敬由中出。義豈在外哉。告子曰。吾非
以長者爲義。但自其長之不同於愛者觀之。
則仁自內而義自外耳。如吾弟至親。吾則愛
之。秦人之弟。其分疎。吾則不愛。是愛主於我。
悅乎我之心。則愛之。不悅乎我之心。人不能

強吾愛也。故謂仁在內也。若義則異是矣。均之長也。楚人之長有可長。吾長之。吾之長有可長。吾亦長之。是敬緣於長。凡遇長皆在所悅。而未必出於吾心也。故謂義在外也。告子此言是猶於長者謂義。而不於長之者謂義。其惑益甚矣。孟子因其明於甘食之性。而以耆炙之說曉之曰。長楚人之長。亦長吾之長。不特於人爲然。卽如耆秦人之炙。亦耆吾之炙。而無異。物亦有同者也。子謂以長爲悅。而

謂義在外。然則耆炙者。以炙爲悅。亦將謂耆之者。在外。與吾之耆。雖在外。而所以耆之者。心。長雖在外。而所以長之者。心。心旣在內。而義之非外明矣。孟子論義。於此可謂至精。事之可否。雖在物。事之所以可。所以否。使其施之各當。則在我。故曰。義者。事之宜。心之制。有天下國家者。欲使事事物物有條有理。亦何可一日少裁制之宜哉。

孟季子問公都子曰。何以謂義內也。曰。行吾敬。

故謂之內也。鄉人長於伯兄一歲。則誰敬。曰。敬兄。酌則誰先。曰。先酌鄉人。所敬在此。所長在彼。果在外。非由內也。公都子不能答。以告孟子。孟子曰。敬叔父乎。敬弟乎。彼將曰。敬叔父。曰。弟爲尸。則誰敬。彼將曰。敬弟。子曰。惡在其敬叔父也。彼將曰。在位故也。子亦曰。在位故也。庸敬在兄。斯須之敬在鄉人。季子聞之曰。敬叔父則敬。敬弟則敬。果在外。非由內也。公都子曰。冬日則飲湯。夏日則飲水。然則飲食亦在外也。

此一章書是明義內之說也。孟季子聞孟子義內之說而未達。私問公都子曰。人皆以義爲外。夫子何獨以義爲內也。公都子曰。義主於敬。所敬之人雖在外。然用吾心之敬以敬之。是敬由心生。不自外至。故夫子以義爲在內也。孟季子曰。敬雖在內。而所敬之人則在外。試以敬長而言。伯兄長於我。我所敬也。假令鄉人又長於伯兄一歲。則誰敬乎。公都子曰。敬以親疎爲厚薄。鄉人雖長。疎不踰親。必

當敬兄也。孟季子曰。伯兄固當敬矣。假令與鄉人同飲。有伯兄在。酌則誰先乎。公都子曰。酌以賓主分先後。伯兄雖親。主不先客。必當先酌鄉人也。孟季子曰。如此可見所敬在伯兄。所酌又在鄉人。惟視其人。以爲轉移。其權全不在我。是義果在外。非在內也。公都子不能答。以告孟子。孟子曰。敬長之心。本在於內。而季子以爲在外。卽如其言。何難辨之有。子試問之曰。弟與叔父。皆屬至親。敬叔父乎。敬

弟乎。彼必曰。卑不抗尊。敬叔父矣。子又問曰。弟爲尸。以象祖考。則誰敬乎。彼必曰。弟旣爲尸。敬弟矣。子卽曰。旣曰敬弟。則叔父不得伸其尊。惡在其敬叔父也。彼必曰。所以敬弟者。以在尸位故也。蓋當其在尸位。則叔父與弟皆子孫。子孫以敬祖考爲重。敬弟者。敬祖考也。子亦曰。所以先酌鄉人者。以在賓位故也。蓋當其在賓位。則伯兄與我皆主人。主人以敬賓客爲重。敬鄉人者。敬賓客也。然則所敬

在此者庸敬之在兄也。亦猶敬叔父之常耳。所長在彼者。斯須之敬在鄉人也。亦猶敬弟之暫矣。或常或暫之間。其敬皆由中出。則義之在內。又何疑乎。孟子子聞孟子與公都子之言。復曰。當敬叔父時。則敬叔父。當敬弟時。則敬弟。因其人而致其敬。義果在外。非在內也。蓋其心猶未悟。故仍執前說。於是公都子就易見者。曉之曰。子以敬爲在外。何不觀飲食之事乎。冬之日宜湯。則從而飲湯。夏之日

宜水。則從而飲水。子以因人起敬。謂之在外。則將以因時酌宜。所以飲食者亦在外。與吾知飲湯飲水。其飲雖同。而冬夏之異。則辨於一心。是故事物之宜在外。而所以斟酌事物之宜。則在心也。此其所以爲義內也。尚何疑於夫子之謂乎。按孟子義內之辨。最簡最明。而告子孟季子。詞雖屢詘。而意終不悟。此真異端之學。所謂不得於言。勿求於心者與。

公都子曰。告子曰。性無善無不善也。或曰。性可

以爲善。可以爲不善。是故文武興。則民好善。幽厲興。則民好暴。或曰。有性善。有性不善。是故以堯爲君而有象。以瞽瞍爲父而有舜。以紂爲兄之子。且以爲君。而有微子啓。王子比干。今日性善。然則彼皆非與。孟子曰。乃若其情。則可以爲善矣。乃所謂善也。若夫爲不善。非才之罪也。

此一章書。是正言性善之旨也。公都子問曰。天下之言性者不一。各執其說以爭辯。如告子曰。性無有善。無有不善。謂全不可以善不

善名也。此一說也。或又曰。性可以使爲善。可以使爲不善。無有一定。惟顧其所習何如爾。是故文武之君在上。率民以善。則民皆化而爲好善之民。幽厲之君在上。率民以暴。則民皆化而爲好暴之民。此又一說也。或又曰。有性善。有性不善。本其生稟之異。而自不可移。是故以堯之聖爲君。而有傲象之臣。不能使不善爲善。以瞽瞍之頑爲父。而有聖舜之子。以無道之紂爲兄之子。且以爲君。而乃有微

子啓王子比干之仁與聖不能使善爲不善。此又一說也。三說之不同如此。皆未有以性善言者。今夫子獨排衆論而曰性善。然則彼之言皆非與。孟子曰。衆人論性皆致疑於善惡之間。而我獨謂性善者。非無所據也。論性於無感之初。至善中存。似無形象之可言。乃若其性之發而爲情。卒然勃然之間。真機畢露。則但可以爲善而不可以爲惡。則性之本善可知矣。此乃吾之所以謂性爲善也。然情

既可以爲善則似莫不具爲善之才。乃有昏
愚暴戾而爲不善者。蓋物欲之累。陷溺其良
心。人爲之私。戕賊其真性。性本善而人自底
於不善耳。於才何罪哉。知才之善。則知情之
善。而無疑於性之善矣。紛紛之說。不亦謬乎。
惻隱之心。人皆有之。羞惡之心。人皆有之。恭敬
之心。人皆有之。是非之心。人皆有之。惻隱之心。
仁也。羞惡之心。義也。恭敬之心。禮也。是非之心。
智也。仁義禮智。非由外鑠我也。我固有之也。弗

思耳矣。故曰。求則得之。舍則失之。或相倍蓰而無算者。不能盡其才者也。詩曰。天生蒸民。有物有則。民之秉夷。好是懿德。孔子曰。爲此詩者。其知道乎。故有物必有則。民之秉夷也。故好是懿德。

此二節書實指情與才之善。以證性之無不善也。孟子曰。我謂情善而性無不善者。於何見之。蓋以人有此情。由有此性。同此性。則同此善。卽如惻隱之心。人孰不有之乎。羞惡之

心。人孰不有之乎。恭敬之心。人孰不有之乎。
是非之心。人孰不有之乎。此情之所以爲善
也。而實根之於性。惻隱之心。非他。卽吾性之
仁。主於愛者是也。羞惡之心。非他。卽吾性之
義。主於宜者是也。恭敬之心。非他。卽吾性之
禮。主於敬者是也。是非之心。非他。卽吾性之
智。主於辨者是也。仁義禮智。雖見端乎外。非
由外來而鑠及於我也。我性中固有之也。惟
其爲固有之理。所以發而爲才。無不可以爲

善者。但人自不思而反求之已耳。故曰。性具於心。苟思而求之。則得其固有而爲聖爲賢。不思而舍之。則失其固有而爲愚不肖。以至於善惡相去。或相倍蓰。而非算數之所能計者。由人自不思不求。不能察識擴充。以盡其才之分量也。凡此者。非我之私言。蓋嘗徵諸詩與孔子之言矣。大雅烝民之詩曰。天生衆民。有形氣者爲物。有天理者爲則。此民所秉執之常性。無不好是懿美之德者。夫物與則。

有精粗之分。秉與好。有寂感之異。而詩顧合而言之。誠有濳義於其間矣。是以孔子讀是詩而歎曰。爲此詩者。其知性情之道乎。蓋天之生人。非徒賦之以形而已。得其氣以成形。而有物。卽得其理以成性而有則。未有物具而則不具者。是物之則。乃民之所秉。執以爲常性也。以其性之有常。故懿美之德。自由中以好之。達諸天下而同有其則。亦達諸天下而同有其好。不獨聖哲有獨契。而庸愚亦有

同心也。由詩與孔子之言觀之。德而曰懿。可以證性善矣。懿德而曰好。可以證性善而情亦善矣。卽此可知人性之皆善。而彼三說者。不辯而自明矣。孟子前後論性善。皆指其存者而言。此獨舉其發者而言。蓋惟其發無不善。故益信其存無不善。反覆開譬。總欲人因一端著見之明。悟本來固有之理。其詞愈切。而其義愈顯矣。

孟子曰。富歲子弟多賴。凶歲子弟多暴。非天之

降才爾殊也。其所以陷溺其心者然也。今夫麴
麥播種而耰之。其地同。樹之時又同。淳然而生。
至於日至之時皆熟矣。雖有不同。則地有肥磽。
雨露之養。人事之不齊也。故凡同類者。舉相似
也。何獨至於人而疑之。聖人與我同類者。

此一章書。是實指性善之同然。以見不可不
反求也。孟子曰。富歲之子弟。多有所賴。藉而
爲善。凶歲之子弟。多至於暴棄而爲不善。猶
是子弟也。而多暴異於多賴者。豈天賦富歲

子弟以爲善之才而不賦凶歲子弟以爲善之才哉。蓋凶歲衣食不足。迫於饑寒。禮義不暇顧。而非僻之念生。有所以陷溺其心者。以至於多暴而然也。若論其心。固統性情與才而無有不善者。又豈有不同者乎。試卽物之同者推之。今夫麴麥之爲物。播其種而復耰以覆之。其地旣同。樹之及時又同。萌芽之發無不渟然而生。至於日至之時。皆已成熟矣。何嘗有不同者。乃其收穫不能無多寡之異。

則因地之有肥磽雨露之滋養與人事勤惰之不齊也。於麴麥何與哉。不特麴麥爲然。天下之物必其類之不同則不相似耳。苟凡同類之物則固無有不相似者。何獨至於人而疑其有不相似乎。蓋雖聖人之德大遠於凡人而究其厥初共稟是氣共受是理未嘗有所分別。謂非與我同類可乎。夫聖人旣與我同類則性之無不善可知矣。

故龍子曰。不知足而爲屨我知其不爲黃也。屨

之相似。天下之足同也。口之於味。有同耆也。易牙先得我口之所耆者也。如使口之於味也。其性與人殊。若犬馬之與我不同類也。則天下何耆皆從易牙之於味也。至於味。天下期於易牙。是天下之口相似也。惟耳亦然。至於聲。天下期於師曠。是天下之耳相似也。惟目亦然。至於子都。天下莫不知其姣也。不知子都之姣者。無目者也。故曰。口之於味也。有同耆焉。耳之於聲也。有同聽焉。目之於色也。有同美焉。至於心。獨無

所同然乎。心之所同然者何也。謂理也。義也。聖人先得我心之所同然耳。故理義之悅我心。猶芻豢之悅我口。

此五節書是卽人身之同。以見人性之同也。孟子曰。人性之同。旣徵之於同類矣。更卽人之一身觀之。龍子嘗有言曰。履之爲物。緣足而造。織屨者。不知人足之大小。而任意爲之。雖未必一一中度。然大以成太。小以成小。我知皆必有用。決不至於爲蕢也。是則天下之

足。無有不同如此。且不但足而已。推之於口。其於甘旨之味。亦有同耆也。雖古之知味。如易牙其人者。不過先得我口之所以耆者也。如使其口之於味。全與人殊。有若犬馬異物之不與我同類也。則天下之人。何其所耆皆從易牙之所調。而共以爲美也。至於味。天下皆期於易牙。是天下之口相似也。又不但口而已。惟耳亦然。至於聲。其調鐘協律。天下之人。皆期必於師曠之所和。而共以爲美。是天

下之耳相似也。又不但耳而已。惟目亦然。至於古之美色如子都者。天下之人莫不知其爲姣好之男子也。若不知子都之姣者。必無目之人。不能見其色者也。是天下之目相似也。卽衆體之皆同如此。吾故曰。口之於味。天下期於易牙。而知者味無不同。耳之於聲。天下期於師曠。而知好音無不同。目之於色。天下期於子都。而知悅色無不同。夫口耳目皆以形用者。尚有所同然。至於心爲口耳目之

主而以神行者。獨無所同然乎。心之所同然者何也。謂此降衷之理。卽吾心之體處物之義。卽吾心之用也。雖窮理精義如聖人。亦不過先知先覺。得我心之同然耳。何嘗別有所稟賦哉。故理義之在我心。不獨聖人悅之。凡人無不悅之。蓋根之於性。同此秉彝之良。則悅之於心。同此懿德之好。猶夫芻豢之味。其悅我口也。盡人皆然也。舉天下之人。莫不口悅芻豢。則舉天下之人。莫不心悅理義。此理

義所以爲同然之心。而聖人與我同類也。彼爲暴者。自失其本心。而豈才之罪哉。上章旣言性善本我固有。反求之而卽得。此又直指性之於善。卽如口耳目之於味聲色。人人同具。聖人與我初無差別。以見決不可不反求。奈何味則知甘。聲色則知美。而理義則不知好。從其小體。而反棄其大體哉。

孟子曰。牛山之木嘗美矣。以其郊於大國也。斧斤伐之。可以爲美乎。是其日夜之所息。雨露之

所潤。非無萌蘖之生焉。牛羊又從而牧之。是以若彼濯濯也。人見其濯濯也。以爲未嘗有材焉。此豈山之性也哉。雖存乎人者。豈無仁義之心哉。其所以放其良心者。亦猶斧斤之於木也。旦旦而伐之。可以爲美乎。其日夜之所息。平旦之氣。其好惡與人相近也者。幾希。則其旦晝之所爲。有梏亡之矣。梏之反覆。則其夜氣不足以存。夜氣不足以存。則其違禽獸不遠矣。人見其禽獸也。而以爲未嘗有才焉者。是豈人之情也哉。

此一章書。是言良心之在人。不可不盡存養之功也。孟子曰。德性雖命於天。而培養全在於人。試以物觀之。齊有牛山。其木茂盛。吾嘗見其美矣。但以近大國之郊。舉國之人。樵採其中。斧斤伐之者衆。豈能復有其美乎。然其美雖失。而其本猶在。日夜之間。氣化之所生息。加以雨露之所滋潤。非無萌蘖之復生焉。夫何牛羊又從而牧之。生之者未幾。戕之者復至。是以若彼濯濯。然而光潔也。人見其濯

濯然光潔。遂以牛山爲未嘗有材焉者。此豈山之性使然哉。亦斧斤伐之於先。而牛羊牧之於後。令其萌蘖無遺爾。不特山木爲然也。雖存乎人者。孰無仁義之心哉。其秉彝之良。不學而知。不慮而能。本然之善。隨感隨見。一如山木之美矣。顧人不能保守。斲喪戕賊。亦猶斧斤之於山木。旦旦而伐之。可以爲美乎。然善心雖遭陷溺。而善端終難盡泯。其日夜之間。未與物接。少有靜息。以至平旦之時。前

境既往。後境未來。良心定然發露。好惡之正。與人相近者幾希。夫何旦晝之所爲。又皆不仁不義之事。梏而亡之矣。夫晝之所爲。既有以害其夜之所息。夜之所息。又不能勝其晝之所爲。是以梏之反覆。展轉而不已。則其夜時清明之氣。日以寢薄。不足以存其仁義之良心。夜氣既不足以存。則雖覩然有人形。而實違禽獸不遠矣。人見其遠於人。而近於禽獸也。而以爲斯人未嘗有天降之才焉者。是

豈人之情使然哉。亦旦晝之枯亡。令其陷溺無餘爾。可不懼哉。

故苟得其養。無物不長。苟失其養。無物不消。孔子曰。操則存。舍則亡。出入無時。莫知其鄉。惟心之謂與。

此二節書見養心之功。貴乎操存也。孟子曰。山木之生意不息。人心之生理無窮。顧養之何如耳。故凡天下之物。苟得其培養之道。則無物不長。况心之生機。未嘗滅息者乎。苟失

其培養之道。則無物不消。况心之萌蘖。僅存無幾者乎。存養之功。其緊要如此。孔子嘗有言曰。有物於此。操之則收斂而存。舍之卽放失而亡。方其存也。有時而入。一瞬息而入者。忽復出。出入初無定時。方其入也。有時在內。一俄頃而內者。忽在外。外內亦無定鄉。如此者。其惟心之謂與。蓋忽動忽靜。旣無機緘之可測。忽理忽欲。又無方所之可求。存之旣極難。而失之又極易。此孔子所以危言之。以警

人也。人可不知警醒。而任其心之放而不收也哉。大抵操存工夫。不出乎主敬。克念罔念。天理人欲。皆判乎此。果能自強不息。使此心刻刻湛然。以造乎至精至粹之域。則靜亦定。動亦定。雖日應萬變。而主宰常在乎我。尚何出入存亡之足言哉。

孟子曰。無或乎王之不智也。雖有天下易生之物也。一日暴之。十日寒之。未有能生者也。吾見亦罕矣。吾退而寒之者至矣。吾如有萌焉何哉。

今夫弈之爲數。小數也。不專心致志。則不得也。弈秋。通國之善弈者也。使弈秋誨二人弈。其一人專心致志。唯弈秋之爲聽。一人雖聽之。一心以爲有鴻鵠將至。息援弓繳而射之。雖與之俱學。弗若之矣。爲是其智弗若與。曰。非然也。

此一章書。是孟子爲齊王用賢。不專而發也。昔孟子之於齊王。旣進見時少。無以勝羣邪之交蔽。而齊王之於孟子。又聽信不專。有以分其心於多途。故孟子私論之曰。君德莫大

於智而智所自成。雖本於性生。亦由於輔導。
今王之不智。乃理之當然。無足疑怪也。蓋人
主之心。養之以義理則明。誘之以物欲則昏。
猶草木然。生於陽和而悴於陰慘。雖有天下
易生之物。若使一日暴之。得乎陽和之氣少。
十日寒之。得乎陰慘之氣多。未有不枯槁而
能生者也。吾見王之時罕。則義理之浸灌不
深。無異一日暴之也。吾退而諂諛雜進。則物
欲之蒙塞何限。無異十日寒之也。王雖善端

發見。非無萌蘖之生。吾其如之何哉。亦終於
昏昧而已。然此未可專爲寒之者咎也。亦王
聽信之未誠耳。今夫弈之爲數。特技藝之末
小數也。不專一其心。以致極其志之所向。則
不得乎弈之精也。如弈之名秋者。通國以爲
善弈者也。使弈秋教二人以弈。其一人專心
致志。惟弈秋之言爲聽。一人雖聽之。乃一心
以爲有鴻鵠將至。思彎弓繫矢而射以取之。
雖與彼人俱學於弈秋。必弗若其學之精矣。

爲是其生稟之智弗若與。非然也。乃心不及其專。志不及其致也。然則王之不智。固羣邪寒之者之罪。亦豈非王鴻鵠其心之過乎。蓋人臣以正君爲先。而欲得正君之益。又視君之所以信用之者之若何耳。明君任賢之心誠專。則君德日新。賢才日進。尚何一暴十寒之爲害也哉。

孟子曰。魚我所欲也。熊掌亦我所欲也。二者不可得兼。舍魚而取熊掌者也。生亦我所欲也。義

亦我所欲也。二者不可得兼。舍生而取義者也。
生亦我所欲。所欲有甚於生者。故不爲苟得也。
死亦我所惡。所惡有甚於死者。故患有所不辟
也。如使人之所欲莫甚於生。則凡可以得生者
何不用也。使人之所惡莫甚於死者。則凡可以
辟患者。何不爲也。由是則生而有不用也。由是
則可以辟患而有不爲也。

此一章書是孟子欲人察識其本心也。孟子
曰。觀於人之欲惡。而可以知此心之所自具。

者矣。今夫魚之味美。我所欲也。熊掌之味亦美。亦我所欲也。其或得魚則失熊掌。得熊掌則失魚。二者不可得兼。則熊掌較魚爲尤美。寧舍魚而取熊掌者也。養生而不害其生。我所欲也。守義而不虧於義。亦我所欲也。其或求生則無以全義。求義則無以保生。二者不可得兼。則義較生爲尤重。寧舍生而取義者也。人之所以舍生取義者。何哉。生本無不欲。而其心之欲義。更甚於生。故不爲苟且以得。

生也。欲生則無不惡死。而其心之惡不義。更甚於死。故雖當患難而甘死不辟也。夫此欲惡之甚於生死者。乃秉彝之良心也。如使人無欲義之良心。而所欲莫甚於生。則凡可以爲得生之計者。何不用也。而安肯輕生。如使人無惡不義之良心。而所惡莫甚於死。則凡可以爲辟患之地者。何不爲也。而安肯赴死。由其心唯義之是欲。則生而或悖於義。有不_レ用也。由其心惟不義之是惡。則可以辟患而

入於不義有不爲也。然則人之生而具此秉
彝義理之心也。蓋亦必然而無疑者爾。

是故所欲有甚於生者。所惡有甚於死者。非獨
賢者有是心也。人皆有之。賢者能勿喪耳。一簞
食。一豆羹。得之則生。弗得則死。噉爾而與之行
道之人。弗受蹴爾而與之。乞人不屑也。萬鍾則
不辨禮義而受之。萬鍾於我何加焉。爲宮室之
美。妻妾之奉。所識窮乏者得我與。鄉爲身死而
不受。今爲宮室之美爲之。鄉爲身死而不受。今

爲妻妾之奉爲之。鄉爲身死而不受。今爲所識窮乏者得我而爲之。是亦不可以已乎。此之謂失其本心。

此四節書是指人羞惡之本心使失其心者知所儆也。孟子承上文言欲生惡死人之常情。而今由秉彝之良心觀之。其欲義甚於生。其惡不義甚於死。非獨賢者有是欲惡之心也。凡人皆有之。但衆人汨於利欲而忘焉。唯賢者能持守而勿失耳。實則賢愚同具。並無

豐嗇也。於何驗之。一簞食。一豆羹。爲物甚微。而在饑者得之則生。弗得則死。以生死所係。宜其欲食之急。而不暇計禮義之若何矣。然苟口呼而授之食。雖行道之常人。弗肯受。更足踐而授之食。雖乞人不以爲潔也。夫當死生之際。而猶惡無禮。寧死而不食。可見欲惡有甚於生死者。乃人人所固有之心也。旣爲人人固有之心。一旦至放而不存者。其由安在。簞食豆羹之微。不以死生之故而遂受者。

辨禮義也。萬鍾之富。則不辨禮義之當得與否。而冒焉受之。將爲一身計乎。萬鍾於我身何所增益焉。其爲欲求宮室之華美。妻妾之供奉。所知識之窮乏者。感我之惠而受此萬鍾。與較之所以處簞食豆羹者。亦甚相遠矣。凡人之切身者。唯死生爲重。舉身外之物。非可與死生並視也。鄉爲身死而不受嘑蹴之食。今乃爲宮室之美。受此無禮義之萬鍾。而亦爲之。鄉爲身死而不受嘑蹴之食。今乃爲

妻妾之奉受此無禮義之萬鍾而亦爲之鄉
爲身死而不受嘑蹴之食。今乃爲所識窮乏
者得我受此無禮義之萬鍾而亦爲之以切
身者而不顧焉。以身外者而必恤焉。是亦不
可以已乎。可已而不已。其於本然之良心喪
失盡矣。人可不以是爲戒哉。甚矣物欲之易
昏也。以不受簞食豆羹之心。不受萬鍾。此心
不旣存乎。而無如見萬鍾。不見禮義也。斯亦
甚昧於輕重大小之宜矣。是故學者脩身必

自致知格物始。

孟子曰。仁。人心也。義。人路也。舍其路而弗由。放其心而不知求。哀哉。人有鷄犬放。則知求之。有放心而不知求。學問之道無他。求其放心而已矣。

此一章書。是孟子勉人從事於心也。孟子曰。人之不可一日離者。莫如仁義。而能盡仁義者寡。是未知其切於身耳。仁者何。人各有自具之心。而其所爲心者。內存夫中正。外著其

慈祥。非以仁爲之體乎。則仁卽人之心也。義者何。人各有當行之路。而其所爲路者。經事主乎宜。變事主乎權。非以義爲之準乎。則義卽人之路也。謂之人心人路。則所以操是心。遵是路者。宜極其至矣。乃舍置其路而不由。放失其心而不知求。其於爲人之理安在。不亦可哀也哉。夫人若有鷄犬放。雖至輕之物。皆知求之。以期於必獲。及有放心。則此身無所統攝。所係至重。而反任其縱逸。不知閑存。

於出入之間。何其明於至輕。而昧於至重也。
抑知心之不可聽其放。而放則不可不求耶。
凡學問中致知力行。其事不一。而其道無他。
心爲一身之主宰。能使心之得其正者。順以
養之。心之入於邪者。慎以閑之。則視聽言動。
皆受治於心而不苟。由此心正而無適非仁。
亦無適非義。積累而上達。奚難也。學問之功。
舍求放心之外。尚復有他道乎。蓋人之心。馳
於外者。欲其收而入存於內者。欲其推而出。

上言三一角身卷之三
三
推則有以見心之用。而收則有以立心之體。
體立而後用行。則存養省察非從事學問之
大原耶。

孟子曰。今有無名之指。屈而不信。非疾痛害事
也。如有能信之者。則不遠秦楚之路。爲指之不
若人也。指不若人。則知惡之。心不若人。則不知
惡。此之謂不知類也。

此一章書。是孟子警人之昧於治心也。孟子
曰。人己之間。所不容自安於屈抑者。正自有

在也。今有無名之指。卷曲而不信。非關一身之疾痛。與舉事之爲害也。如有能治之。使信者。則雖越秦楚相去之路。不以爲遠。而求信之。爲其指之屈。不若人之信也。果爾。則凡我之不若人者。皆當知所愧勉矣。夫一指至小也。指之屈。不若人之信。亦至小也。猶知惡之。而不肯任其屈。至於心。非指之可比也。而失之回邪。不若於人。不大負上天生我之良乎。乃甘爲人下而不知惡。則亦闇於輕重之理。

矣。此之謂不知類也。人何不推愛指之意反而求之於心哉。蓋人之與聖人同類者。以心之同耳。誠知反求之心。存其若人者。去其不若人者。擴而充之。雖爲堯爲舜。奚難哉。

孟子曰。拱把之桐梓。人苟欲生之。皆知所以養之者。至於身而不知所以養之者。豈愛身不若桐梓哉。弗思甚也。

此一章書。是孟子示人以身之當養也。孟子曰。凡身之與物。輕重懸殊。而人之愛身。多有

不如其愛物者。今有桐梓之二木。其長而成拱成把。人苟以爲美材。而欲生之。皆知培植灌溉。盡其所以養之之道。至於身。三綱五常繫焉。四端萬善備焉。宜其養之不容自己矣。而乃內不知所以養其心。外不知所以養其體。豈愛身不若愛桐梓哉。中有所蔽。而未嘗一思於輕重之間也。誠思之。而有不知以養身爲要乎。蓋人非不知極口體之養。而愈養而愈失者。昧於養之正也。故必使我心優游。

於義理而動容周旋各當其道斯爲善養耳。
孟子曰人之於身也兼所愛兼所愛則兼所養
也無尺寸之膚不愛焉則無尺寸之膚不養也。
所以考其善不善者豈有他哉於己取之而已
矣。體有貴賤有大小無以小害大無以賤害貴。
養其小者爲小人養其大者爲大人。今有場師
舍其梧櫨養其槭棘則爲賤場師焉。養其一指
而失其肩背而不知也則爲狼疾人也。飲食之
人則人賤之矣。爲其養小以失大也。飲食之人

無有失也。則口腹豈適爲尺寸之膚哉。

此一章書。是孟子示人以養身當知所重也。孟子曰。身不可不養。而又不可不知養之要也。人之於身。舉四肢百骸。孰非其所愛護者。旣兼所愛。則必悉加調養。無尺寸之肌膚不愛焉。則無尺寸之肌膚不養也。獨是有養之而爲善者。有養之而爲不善者。所以考其養之善與不善者。豈有他術哉。反之於己。而審其何者爲輕。何者爲重。則自可得而知矣。然

我謂審乎己之輕重。而知養之善不善者何故。蓋衆體皆吾體也。而有貴賤小大之別。有貴賤小大。則其輕重較然。不可弇養乎小。而以小害大。不可弇養乎賤。而以賤害貴。若使養其小者。將崇尚卑鄙。而日流於汙下。則爲小人無疑。此養之不善者也。若使養其大者。將持守中正。而日進於高明。則爲大人無疑。此養之至善者也。信乎小大貴賤之間。當深思而擇所養矣。卽以木言。梧櫟美材也。棘棘

非美材也。今有治場圃者。舍其梧櫟而不養。反養其槭棘。則爲場師之賤者焉。以賤害貴者。其異於此乎。卽以身言。一指其小者也。肩背其大者也。今有養身者。養其一指而不忍傷。乃喪失其肩背而不知也。則如狼之疾走而不能顧後之人也。以小害大者。其異於此乎。人之於身。誠毋容忽於貴且大者哉。苟其徒事口腹。而爲飲食之人。則人無不賤惡之矣。爲其養口腹之小體。而失心志之大體也。

使飲食之人。而能兼養大體。無有失也。則口腹亦軀命所關。在所宜養。非但爲尺寸之肌膚而已。無如養小者之無不失大也。人可不以小害大。賤害貴爲戒也乎。蓋養心志者。非不養口腹也。但養心志。則天理爲重。雖飲之食之。不過守其當飲當食之常。養口腹。則人欲爲重。不至極口腹之欲。而滅天理不止也。能不養小以失大。乃所以遏人欲而存天理爾。

公都子問曰。鈞是人也。或爲大人。或爲小人。何也。孟子曰。從其大體爲大人。從其小體爲小人。曰。鈞是人也。或從其大體。或從其小體。何也。曰。耳目之官。不思而蔽於物。物交物。則引之而已矣。心之官。則思。思則得之。不思則不得也。此天之所與我者。先立乎其大者。則其小者不能奪也。此爲大人而已矣。

此一章書。是孟子教人以事心之功也。公都子問於孟子曰。天下稟形氣之正而爲人者。

等耳。乃或有稱爲大人。或有稱爲小人。此何故也。孟子曰。人無異。而人之所從有異。人之所從既有異。而人遂不能無異。凡人一身。體有大小。以大體爲身之主。而一從其檢攝。則爲大人。以小體爲身之主。而一從其徵逐。則爲小人。公都子復問曰。同此人。則同此體。乃或有從其大體。或有從其小體。又何故也。孟子曰。體之大小有辨。而人之從違亦於此見焉。如耳司聽。目司視。各有所職。而不能思。故

聲色之外物。得以蔽之。夫至不能思而蔽於外物。是耳目亦一物而已。以彼聲色之物。接於此耳目之物。其引之而去不難矣。所以耳目爲小體也。若心則至虛至靈。而以思爲職。心率其職而勤於思。則得其理而物不能蔽。曠其職而怠於思。則不得其理而物來蔽之。理之得失。惟係於心。所以心爲大體也。大體小體。皆天之所以與我者。能於其大者。先有以立之。清明而不昧。強固而不移。卓然爲羣。

動之綱維。則其耳目之小者。一聽命於心而不苟。凡聲色之邪。不得而奪其聰明之正也。能從其大體如是。則理無不全。德無不備。稱之爲大人。以此而已矣。非然而徇於耳目之私。有不流爲小人者哉。蓋體既有能思不能思之別。則所受於天者。原自有以大制小之理。奈何不予心以有所主。予耳目以有所承耶。古來大聖大賢。舍治心之外。無他道也。

孟子曰。有天爵者。有人爵者。仁義忠信。樂善不

倦此天爵也。公卿大夫此人爵也。古之人脩其天爵而人爵從之。今之人脩其天爵以要人爵。既得人爵而棄其天爵。則惑之甚者也。終亦必亡而已矣。

此一章書是孟子爲當時重勢位而輕道德者發也。孟子曰。人情莫不以爵爲尊。而抑知身以內自有其甚尊者乎。有稟於天而爲天爵者。有授於人而爲人爵者。何謂天爵。心之慈惠曰仁。心之裁制曰義。仁義存諸己。無不

盡曰忠。仁義施諸事。無不實曰信。而且樂此仁義忠信之善。雖歷久而不倦。性分之榮。孰有榮於此者乎。此天爵也。何謂人爵。公一位。卿一位。大夫一位。時遇之隆。孰有隆於此者乎。此人爵也。爵有天人之別。則其不徒求乎爵之在世者。而務反求乎爵之在身者明矣。古之人有見於道德爲重。是以存乎仁義忠信之理。而盡其樂善不倦之誠。祇惟脩其天爵已耳。初非有意於人爵也。而積累既至。名

譽自昭。公卿大夫之爵。有必從焉。今之人。則大異於古人矣。富貴利欲之心。勝初亦若有事於天爵。而勉強以脩之。然不過藉此爲要求人爵之地。及人爵旣得。所期已遂。隨以天爵爲無用而棄之。夫脩天爵以要人爵。是脩之之日。原先有棄之之心。已不免於惑矣。至得人爵而棄天爵。是得之之後。并不及要之之時。則惑之甚者也。終亦并其所得之人爵而無以保之。歸於必亡而已矣。蓋世豈無脩

孟子卷之三
天爵而人爵不從者。不知其不從者。上之遺賢。而理無不從也。又豈無棄天爵而人爵不亡者。不知其不亡者。下之僥倖。而理無不亡也。學者亦務脩其在己之天爵可耳。若人爵之從亡。又何容計及哉。

孟子曰。欲貴者。人之同心也。人人有貴於己者。弗思耳。人之所貴者。非良貴也。趙孟之所貴。趙孟能賤之。詩云。既醉以酒。既飽以德。言飽乎仁義也。所以不願人之膏粱之味也。令聞廣譽施

於身。所以不願人之文繡也。

此一章書。是孟子示人以當求諸己。而不必求諸人也。孟子曰。世之趨於勢分。而忽於性分者。亦甚謬矣。爵位之貴。爭慕而欲得者。人心之所同也。不知人人各有至貴於己者。特弗反而自思耳。奈何舍在己之貴。而求在人之貴耶。人之以爵位加己。而後貴者。不可謂不貴。而非若己所自有之良貴也。如趙孟爲晉之世卿。能操爵以與人。而使之貴。亦能奪

之而使之賤。是貴之有待於人者。安可恃乎。
若良貴。則非人所得而操其權者矣。是乃真
足貴也。何以見之。大雅既醉之詩有云。既醉
以酒。既飽以德。不曰飽味而曰飽德者。何也。
德之至者。和厚以居身。權宜以制事。所謂飽
德者。蓋言飽乎仁義也。仁義充足。則至理悅
心。極天下美物之饜飫。莫甘於此焉。若人之
膏粱亦何足羨。所以不願人之膏粱之味也。
且仁義充足。則聞譽昭著。極天下被體之采。

章莫榮於此焉。若人之文繡亦何足艷。所以
不願人之文繡也。夫飽乎仁義而不願膏粱
文繡。則知良貴爲足貴。而趙孟之所貴不足
貴矣。何弗反而自思也哉。蓋人惟不知己之
自有至貴。是以舍內而慕外。舍己而求人耳。
誠知其有貴於己者。尚何勢分之物足以易
夫性分之良也與。

孟子曰。仁之勝不仁也。猶水勝火。今之爲仁者。
猶以一杯水。救一車薪之火也。不熄。則謂之水

不勝火。此又與於不仁之甚者也。亦終必亡而已矣。

此一章書。是孟子爲爲仁而不力者言也。孟子曰。理欲不容兩存。仁之足以勝不仁。猶水之足以勝火。乃必然而無疑者。但今之爲仁者。其爲之不力。以暫存之天理。遏無窮之人欲。猶夫持一杯水。救一車薪之火也。其可得而滅熄乎。至火不熄。則從而謂之水不勝火。斯言一出。而不仁之人。皆以爲仁不可以勝

不仁而自甘於理。消欲長。幾希漸滅。此其所爲。又有以助於不仁之甚者也。非惟無益於仁。亦且放逸牯亡。終必并其所爲幾微之仁而亡之矣。爲仁者可不以是爲戒與。蓋理欲消長。遞爲貞勝。而欲終不可以勝理。凡從事於仁者。能爲必勝之計。則道心自盛。人心自微。何患德業之不底於成哉。傳曰。戰勝而肥。其此之謂與。

孟子曰。五穀者種之美者也。苟爲不熟。不如莢

稗。夫仁亦在乎熟之而已矣。

此一章書。是孟子勉人之力於爲仁也。孟子曰。仁道之期於有成也。不卽五穀觀之而可見乎。五穀者。天生之地。成之。而人食之。誠種類之美者也。然必熟而後成其美。苟爲不熟。則反不如莠稗之熟。其實猶可以資日用。是五穀之不容不熟也。有然。若仁爲五德之元。衆善之長。亦惟在乎日新不已。由勉而利。由利而安。使此心純然天理之流行。如是以熟。

之而已矣。不然而徇於物欲之私。失其德性之良。不幾與五穀之不熟者等乎。蓋仁當既熟之後。若無所容其力矣。而方期有以熟之。則安可聽其優游自便爲哉。仁固本於天而成於人者也。傳曰。中心安仁。又曰。安土敦乎仁。熟之謂與。

孟子曰。羿之教人射。必志於彀。學者亦必志於彀。大匠誨人。必以規矩。學者亦必以規矩。

此一章書。是孟子言事必有法而後可成也。

孟子曰。凡授受之間。何者可以無法乎。卽以射言之。持弓引滿者。彀也。是射之法也。從來善射。莫如羿。雖羿之教人射。必期至於彀。學羿之射者。亦必期至於彀。舍彀之外。無以爲教。并無以爲學也。更以匠言之。爲圓爲方者。規矩也是工之法也。從來良工。莫如大匠。雖大匠之誨人。制器必示以規矩。學大匠之制器者。亦必守以規矩。舍規矩之外。無以爲教。并無以爲學也。曲藝且然。况聖人之道乎。蓋

人之於道其爲有漸其進有序。自灑掃應對
以至禮儀威儀猶射之彀工之規矩也。君子
教人非不欲一蹴而進之高深之域而必循
乎次第不敢凌躐者道在則然也。下學上達
學者宜知所從事焉。

日講四書解義卷之二十三

日講四書解義卷之二十四

孟子 下之六

告子章句下

任人有問屋廬子曰。禮與食孰重。曰。禮重。色與禮孰重。曰。禮重。曰。以禮食則饑而死。不以禮食則得食。必以禮乎。親迎則不得妻。不親迎則得妻。必親迎乎。屋廬子不能對。明日之鄒以告孟子。孟子曰。於答是也。何有不揣其本而齊其末。方寸之木。可使高於岑樓。金重於羽者。豈謂一

鉤金與一輿羽之謂哉。取食之重者與禮之輕者而比之。奚翅食重。取色之重者與禮之輕者而比之。奚翅色重。往應之曰。紾兄之臂而奪之食。則得食。不紾則不得食。則將紾之乎。踰東家牆而褻其處子。則得妻。不褻則不得妻。則將褻之乎。

此一章書見理欲之辨。當論其常而不當論其變也。昔任國之人。以孟子守禮。而屋廬子乃孟子弟子。故問於屋廬子曰。人無不甘食。

者而食之中有禮。禮與食孰重。屋廬子曰。禮以節飲食之流。食雖不可無。而禮重於食。任人又問曰。人無不悅色者。而色之中有禮。禮與色孰重。屋廬子曰。禮以防男女之欲。色雖不可廢。而禮重於色。於是任人曰。禮固重於食。色設時當饑餓。而與吾食者。未必致敬。以有禮。以禮食。則饑餓而死。不以禮食。則得食而生。亦將必以禮乎。設時當貧乏。而欲娶妻者。不能備物以行禮。親迎則不得妻。而廢倫。

不親迎則得妻以全倫亦將必親迎乎。屋廬
子窮於任人之言而不能答。明日之鄒以告
孟子。孟子曰。於答是言也。何難之有。禮之重
於食色者。以大分較而言也。若不較以大分
則食色自反重於禮矣。譬如定物之高卑者
必平其本而後末之高卑可定。若不先揣其
本而但齊其末。則方寸至卑之木。可使升之
而高於岑銳之樓。任人之謂食色重於禮也
不猶是乎。且禮本重而食色本輕。猶之金本

重而羽本輕也。然金重於羽者。豈謂一鈞至少之金。與一輿至多之羽哉。則禮之所以重於食色者。夫亦可推矣。大凡輕之中原有其重者。重之中原有其輕者。是必輕者與輕者比。重者與重者比。而輕重始得其正。饑而死。食之重者也。以禮食。禮之輕者也。以食之重者與禮之輕者而比之。則禮之輕於食。相去懸絕。豈但食重而已。得妻已之重者也。親迎禮之輕者也。取色之重者與禮之輕者而比。

之則禮之輕於色。相去懸絕。豈但色重而已。
汝何不往應之。曰。食所宜重矣。有如紵兄之
臂而奪之食。非禮之甚者也。爲非禮則得食。
不爲非禮則不得食。食固重而敬兄之禮亦
不輕。則將紵之乎。吾知寧饑以死而必不紵
矣。禮不重於食哉。色所宜重矣。有如踰東家
牆而褻其處子。非禮之甚者也。爲非禮則得
妻。不爲非禮則不得妻。色固重而婚娶之禮
亦不輕。則將褻之乎。吾知寧不得妻而必不

摟矣。禮不重於色哉。以禮與食色之並重者較之。而見禮之尤重如此。彼任人一偏之說。亦不足辨矣。可見聖賢酌乎理欲之輕重。固決之於大分。尤能權其變以守其常。亦所以遏人欲於橫流。存天理於幾滅。聖賢維持世道之意良深哉。

曹交問曰。人皆可以爲堯舜。有諸。孟子曰。然。交聞文王十尺。湯九尺。今交九尺四寸以長。食粟而已。如何則可。曰。奚有於是。亦爲之而已矣。有

人於此。力不能勝一匹雛。則爲無力人矣。今日
舉百鈞。則爲有力人矣。然則舉烏獲之任。是亦
爲烏獲而已矣。夫人豈以不勝爲患哉。弗爲耳。
此一章書。見聖人可爲而不假外求也。曹君
之弟名交者。問於孟子曰。古之稱大聖人者。
莫如堯舜。若未易企而及矣。吾聞人皆可以
爲堯舜。不識有此理否。孟子曰。然。堯舜無不
可爲也。曹交又問曰。從來能爲堯舜之聖者。
若湯與文王是已。交聞文王身長十尺。湯九

尺。今交九尺四寸以長。不及文王而過於湯。以形體言。則無異於湯文矣。然無他材德也。但食粟而已。必如何而可以爲堯舜耶。孟子曰。爲堯舜者奚有於形體哉。亦在奮然以爲之而已矣。如有人於此。其初力不能勝一匹雛之輕。則爲無力人矣。今日能舉百鈞。則爲有力人矣。其所以爲有力無力人者。存乎舉之重輕。則所以爲堯舜與不爲堯舜者可知。然則爲堯舜所爲之事。是亦爲堯舜。猶之舉

烏獲所舉之任。是亦爲烏獲而已矣。夫人豈以不能勝堯舜之事爲患哉。特甘於暴棄而弗爲耳。果能爲之。而何不勝之有。

徐行後長者。謂之弟。疾行先長者。謂之不弟。夫徐行者。豈人所不能哉。所不爲也。堯舜之道。孝弟而已矣。子服堯之服。誦堯之言。行堯之行。是堯而已矣。子服桀之服。誦桀之言。行桀之行。是桀而已矣。曰。交得見於鄒君。可以假館。願畱而受業於門。曰。夫道若大路然。豈難知哉。人病不

求耳。子歸而求之。有餘師。

此四節書言道不難行。而人之求道者宜篤也。孟子曰。人之不求爲堯舜者。或者爲之而難。則將懼其高遠。而非有難爲者也。徐行而後於長者。卽謂之弟。疾行而先於長者。卽謂之不弟。夫此徐行者。豈其高遠難爲。而人所不能哉。但忽焉而有所不爲也。不知堯舜之道。雖無所不該。然不過率其良知良能之性。以充滿其分量。而何嘗於孝弟之外。更有所

增益乎。明乎堯舜之道無他。則於以爲堯舜之所爲。不易易哉。是在子之審處而力圖之耳。堯之衣服言行。一循乎孝弟者也。子誠服堯之服。則服不異乎堯。誦堯之言。則言不異乎堯。行堯之行。則行不異乎堯。是亦堯而已矣。若使出乎堯。則入乎桀。桀之衣服言行。悉悖乎孝弟者也。子苟服桀之服。則服不異乎桀。誦桀之言。則言不異乎桀。行桀之行。則行不異乎桀。是亦桀而已矣。堯與桀之辨存乎

一轉移之間。可不勉爲堯。勉爲舜。而徒區區形體之是恃耶。曹交聞孟子之言。乃曰。交得見於鄒君。可以假館。願畱於鄒。而受業於夫子之門。以求盡爲堯舜之功焉。孟子曰。子欲假館而受業者。以道未易知。而欲師我以求道也。夫道爲衆人之所共由。譬若大路然。豈幽隱而難知哉。人患不求耳。子歸而求之事親敬長之間。而淡體吾所謂孝弟之道。則性分之內。衆理發見。無往非道。則無往非師。不

亦有餘師乎。何必畱此而受業也。蓋堯舜以爲之而造其極。而所以爲之者。又在致知以明其爲之之理。力行以盡其爲之之實。孟子直爲萬世之學爲堯舜者訓也。而豈僅訓曹交乎哉。

公孫丑問曰。高子曰。小弁。小人之詩也。孟子曰。何以言之。曰。怨。曰。固哉。高叟之爲詩也。有人於此。越人關弓而射之。則已談笑而道之。無他。疏之也。其兄關弓而射之。則已垂涕泣而道之。無

他戚之也。小弁之怨親親也。親親仁也。固矣夫。
高叟之爲詩也。曰。凱風何以不怨。曰。凱風親之
過小者也。小弁親之過大者也。親之過大而不
怨。是愈疏也。親之過小而怨。是不可磯也。愈疏
不孝也。不可磯亦不孝也。孔子曰。舜其至孝矣。
五十而慕。

此一章書見處人倫之變。在順乎情理之當
然也。公孫丑問於孟子曰。齊人有高子曰。昔
周幽王太子宜臼被廢。而作小弁之詩。其辭

其意大不類仁人孝子之用心。乃小人之詩也。孟子曰。高子何以言之。公孫丑曰。高子以爲小弁有怨其親之意。是以謂爲小人之詩。孟子曰。固哉執滯而不通。其高叟之治詩也。小弁乃怨其所當怨。而豈可以是議之乎。譬如。有塗人於此。本不可射者也。乃越國之人。關弓而射之。則已於其旁。談笑而勸阻之。無他。疏越人。故言之異也。苟其兄關弓而射之。則已於其旁。垂涕泣而力阻之。無他。戚其兄。

故言之迫也。小弁之事。乃父子之異變。宗社之傾危。係焉。正與兄之關弓射人。無異。其怨也。乃親親之心也。親親。仁之發也。而何得遽以是議之。高叟之爲詩也。執滯而不通矣。公孫丑又問曰。小弁之怨。宜矣。昔衛有七子之母。不能安其室。七子因而作凱風之詩。凱風之於母。正如小弁之於父。若所當怨矣。何以獨自責而不怨。孟子曰。凱風。親之過在身家。過之小者也。小弁。親之過。關宗社。過之大者。

也。親之過大而不怨。則視其親若不相涉。是
愈親而愈疏也。親之過小而怨。則親有過而
不能忍。是如水之易怒而不可磯也。愈親而
愈疏。待親之薄而不孝也。易怒而不可磯。亦
待親之薄而不孝也。小弁與凱風。一怨一不
怨。均之無忝於孝。而安得以稱凱風者。抑小
弁哉。孔子嘗曰。孝之至者。其惟舜矣。年五十
而猶怨慕也。以怨慕爲至孝。奈何以賦小弁
者爲非孝乎。高子之言謬矣。於此見人子之

事親處常處變各有其道。總不失乎情理之正而已。

宋牼將之楚。孟子遇於石丘。曰。先生將何之。曰。吾聞秦楚構兵。我將見楚王。說而罷之。楚王不悅。我將見秦王。說而罷之。二王我將有所遇焉。曰。軻也。請無問其詳。願聞其指。說之將何如。曰。我將言其不利也。曰。先生之志則大矣。先生之號則不可。先生以利說秦楚之王。秦楚之王悅於利以罷三軍之師。是三軍之士樂罷而悅於

利也。爲人臣者懷利以事其君。爲人子者懷利以事其父。爲人弟者懷利以事其兄。是君臣父子兄弟終去仁義懷利以相接。然而不亡者未之有也。

此一章書見謀國者當以仁義爲正而不當言利也。戰國時有姓宋名牼者將往楚國。孟子適遇於石丘之地。問曰。先生將何所往。宋牼曰。時尚戰爭。生民之禍烈矣。有心斯世者當思所以轉移之。吾聞秦楚構兵。我將南見

楚王說而罷其兵。如使楚王不悅於吾之說。我將西見秦王。說而罷其兵。不合於楚。必合於秦。二王我將有所遇焉。孟子曰。軻也。請無問其說之詳。願聞其說之指。說之將何如。以爲辭也。宋牼曰。我將言其構兵之不利也。孟子曰。處今日而能以罷兵息民爲說。先生之志可謂大矣。但先生所說以利爲名號。則不可。蓋旣言不利。將必言利矣。先生以利說秦楚之王。秦楚之王悅於利。以罷三軍之師。是

三軍之士。自將帥以及卒伍。無不樂罷而悅於利也。利名一倡。則天下惟知趨利。爲人臣者。懷利己之心。以事其君。而不誠於事君。爲人子者。懷利己之心。以事其父。而不誠於事父。爲人弟者。懷利己之心。以事其兄。而不誠於事兄。是盡君臣父子兄弟。終去仁義。皆懷利以相接。將見罷兵雖息。一時之患。而徇利實傷萬世之彝。如此而不滅亡者。未之有也。先生以仁義說秦楚之王。秦楚之王。悅於仁義。

而罷三軍之師。是三軍之士樂罷而悅於仁義也。爲人臣者懷仁義以事其君。爲人子者懷仁義以事其父。爲人弟者懷仁義以事其兄。是君臣父子兄弟去利懷仁義以相接也。然而不王者。未之有也。何必曰利。

此一節書見仁義之可以致王也。孟子曰。言利之害如此。必何以說之而後可。惟有仁義而已。先生誠以仁義說秦楚之王。極言搆兵之殃民而不仁。過制而非義。秦楚之王。悅於

仁義而罷三軍之師。是三軍之士。自將帥以
及卒伍。無不樂罷而悅於仁義也。仁義之名
旣倡。則天下咸知趨於仁義。爲人臣者。懷仁
義之心以事其君。而必期乎忠。爲人子者。懷
仁義之心以事其父。而必期乎孝。爲人弟者。
懷仁義之心以事其兄。而必期乎悌。是盡君
臣父子兄弟皆去利懷仁義以相接也。將見
下焉者。一循乎尊親之典。上焉者。不失乎綱
紀之宜。如此而不致王者。未之有也。仁義未

嘗不利。何必以利爲言哉。乃知利之名不可爲訓也。說以利而亡。說以仁義而王。無他。興亡之故。係於人心。而所以正人心者。在正之以道爾。

孟子居鄒。季任爲任處守。以幣交。受之而不報。處於平陸。儲子爲相。以幣交。受之而不報。他日由鄒之任見季子。由平陸之齊不見儲子。屋廬子喜曰。連得間矣。問曰。夫子之任見季子之齊。不見儲子。爲其爲相與。曰。非也。書曰。享多儀。儀

不及物。曰不享。惟不役志于享。爲其不成享也。
屋廬子悅。或問之。屋廬子曰。季子不得之鄒。儲
子得之平陸。

此一章書。見聖賢報施之各當也。孟子居鄒
時。任君之弟季任爲之居守其國。以幣帛交
於孟子。孟子受其幣而不往見以報之。又處
於齊平陸之地。時儲子爲齊相。以幣帛交於
孟子。孟子亦受其幣而不往見以報之。他日
由鄒之任見季子。由平陸之齊不見儲子。均

之以幣交者也。而見不見異。於是屋廬子喜
曰。一見一不見。在夫子必自有道。連得其間。
隙而問矣。問曰。夫子之任見季子之齊不見。
儲子母乃爲其爲相。不若季子攝守君位。故
輕之而不見與。孟子曰。子疑以爲相而不見。
非也。周書洛誥之篇有曰。享上以禮意爲本。
必先有禮意而後用物以將之。乃可爲享。若
使物有餘而禮意不足。則儀不及物。曰不享。
以其不用志於享故也。書之言如此。其意蓋

謂不用志於享。則雖有享之名。而不成享之禮矣。爲其不成享。故曰不享也。觀於書言。而我之所以見與不見可知矣。屋廬子於是明乎見不見之故。遂悅形於色。而或人則未知何以爲成享不成享也。乃問之。屋廬子曰。季子爲君居守。不得之鄒。以見孟子。是制於禮者也。則雖以幣交。而禮意已備。此之謂成享。儲子爲齊相。得之平陸。以見孟子。而不來見。是簡於禮者也。則雖以幣交。而禮意不及其

物。此之謂不成享。夫既有成享。不成享之別。則夫子之一見一不見。不亦宜乎。由此知君子與人相接之際。一視乎禮意之誠否。以行吾義焉者也。而豈可以一律論哉。

淳于髡曰。先名實者。爲人也。後名實者。自爲也。夫子在三卿之中。名實未加於上下而去之。仁者固如此乎。孟子曰。居下位。不以賢事不肖者。伯夷也。五就湯。五就桀者。伊尹也。不惡汙君。不辭小官者。柳下惠也。三子者。不同道。其趨一也。

一者何也。曰。仁也。君子亦仁而已矣。何必同。曰。魯繆公之時。公儀子爲政。子柳子思爲臣。魯之削也。滋甚。若是乎。賢者之無益於國也。曰。虞不用百里奚而亡。秦穆公用之而霸。不用賢則亡。削何可得與。

此一章書。見孟子去就之有道也。淳于髡曰。凡名生於實。有功利之實。斯有功利之名。以名實爲先而爲之者。是欲濟時以爲人者也。以名實爲後而不爲者。是欲獨善以自爲者。

也。夫子位在三卿之中。則非自爲者比。乃名實未加於上下。旣不能正君。復不能救民。而遂去之而不顧。則又非所以爲人矣。自爲爲人。兩失其道。仁者之用心。固如此乎。此蓋譏孟子仕齊。未有功而遽去也。孟子曰。子安得執去就之迹。以論仁。夫亦揆於去就之義可耳。如居士庶之下位。不以己之賢。事人之不肖者。伯夷也。承湯之聘。而五就湯。湯進之桀。而五就桀者。伊尹也。不惡汙濁之君。而弗事。

不辭卑小之官而弗爲者。柳下惠也。三子者。或則去。或則就。或則有去亦有就。其道若不同。而其志趨則一也。一者何也。曰仁也。無私心而合天理之謂仁。就者不失爲仁。去者未嘗非仁。然則君子之去就。亦惟求其心之無私。事之合乎天理而已矣。若夫去就之迹。何必同哉。淳于髡又以孟子雖不去齊。亦不能有功於齊。乃譏孟子曰。魯繆公之時。公儀子爲執政之卿。子柳子思爲師傅之臣。宜其足

以興魯矣。而魯地之見削奪也滋甚。若是乎
賢者之無益於國也。孟子曰。賢者豈爲無益
於國乎。百里奚。賢者也。虞以不用百里奚而
亡其國。秦穆公用之而霸諸侯。不用賢則亡。
求其如魯之削。何可得與。魯之僅止於削而
不亡者。正以用三賢故耳。而何言無益於國
耶。

曰。昔者王豹處於淇。而河西善謳。緜駒處於高
唐。而齊右善歌。華周杞梁之妻善哭其夫。而變

國俗有諸內必形諸外。爲其事而無其功者。髡未嘗覩之也。是故無賢者也。有則髡必識之。曰。孔子爲魯司寇。不用。從而祭。燔肉不至。不稅冕而行。不知者以爲爲肉也。其知者以爲爲無禮也。乃孔子則欲以微罪行。不欲爲苟去。君子之所爲。衆人固不識也。

此二節書是因淳于髡之疑而折其不能識賢也。淳于髡以孟子仕齊無功不足爲賢。復譏孟子曰。昔者衛人王豹善謳者也。處于河

西淇水之側。而河西化之。皆善謳。齊人繇駒
善歌者也。處於齊右高唐之地。而齊右化之。
皆善歌。齊臣華周杞梁戰死於莒者也。其妻
哭之哀。而國俗化之。皆善哭。卽此推之。凡有
道德積諸內者。必有事功。見諸外。爲其事而
無其功者。髡未嘗見其人也。是故有功則爲
賢者。不見其功。是無賢者也。如其有之。則髡
必見其功而識之矣。孟子曰。子亦知賢者之
不易識乎。孔子嘗爲魯司寇之官。魯之君相。

國語卷之二十四
惑於齊女樂而不用。宜可以行矣。時方郊祭。乃從而祭。禮當致膳於大夫。而膳肉不至。遂不及脫祭祀之冕而行。在不知者。以爲爲肉而行也。卽其知者。亦以爲爲無禮而行也。皆非知孔子者也。蓋孔子之心。惟恐於父母之國。顯其君相之失。則欲以君相之微罪行。而又不欲爲無故而苟且以去國。故不行於女樂。旣受之時而行於膳肉不至之後。其見幾明決。而用意忠厚。當時誰有能識之者。可見

君子之所爲。出於尋常思慮之外。而不徒徇於形迹之微。衆人固不識也。而遽謂能識賢者哉。蓋孟子之去就。法乎孔子者也。孔子去國之意。不欲明言。直俟孟子始發明之。則孟子之去齊。亦必有不欲明言者。自非淳于髡之所易識爾。

孟子曰。五霸者。三王之罪人也。今之諸侯。五霸之罪人也。今之大夫。今之諸侯之罪人也。天子適諸侯曰巡狩。諸侯朝於天子曰述職。春省耕

而補不足。秋省斂而助不給。入其疆。土地辟。田
野治。養老尊賢。俊傑在位。則有慶。慶以地。入其
疆。土地荒蕪。遺老失賢。梟克在位。則有讓。一不
朝。則貶其爵。再不朝。則削其地。三不朝。則六師
移之。是故天子討而不伐。諸侯伐而不討。五霸
者。搜諸侯以伐諸侯者也。故曰五霸者。三王之
罪人也。

此一章書。是孟子傷世道之衰。以警當時之
君若臣也。五霸。齊桓。晉文。秦穆。宋襄。楚莊。三

王。夏禹。商湯。周文武。孟子曰。當春秋之世。五霸不謂無功。而未能無罪。其得罪於三王。則三王之罪人也。至於今。而君若臣更有不可言者矣。今之諸侯。得罪於五霸。則五霸之罪人也。今之大夫。又得罪於今之諸侯。則今之諸侯之罪人也。五霸所以爲三王之罪人者。何也。三王之制。天子以時適於諸侯。而察所守。曰巡狩。諸侯以時朝於天子。而陳其職。曰述職。且天子諸侯。當春則省民之耕種。而補

其不足。當秋則省民之收斂。而助其不給。巡狩之事如何。入諸侯之疆界。見其土地墾辟而無草萊。田野耘治而無曠廢。養高年之老者。而不至於凍餒。尊有德之賢者。而不至於褻慢。諸凡俊傑有才之人。皆布列在位。而政事釐舉。如是則有慶。慶則予之以地。蓋賞之以示勸也。若使入諸侯之疆界。見其土地荒蕪。而非惟不辟。亦且不治。高年之老者。遺棄而不養。有德之賢者。放失而不尊。諸凡掊克

好利之臣。皆布列在位。而賦斂煩興。如是則有讓。蓋責之以示懲也。述職之事如何。朝會有常期。天下諸侯孰敢不朝。其或有不朝者。天子各有道以處此矣。一不朝。則貶抑其爵。或上公貶爲侯伯。或侯伯貶爲子男。再不朝。則削奪其地。或百里削爲七十里。或七十里削爲五十里。三不朝。則舉六師之衆。誅其人而更立之。法制既定。賞罰征討之權。操於天子。下焉者。特奉而行之耳。是故天子出令以

討有罪。而不至親伐。諸侯承命以伐有罪。而不敢擅討。若五霸者。摟合諸侯以攻伐諸侯。則既無出令。并非承命。但以形勢驅率羣國。名若出於公。而實以遂其私。敗壞三王之法。制莫有甚於此者也。故曰五霸者。三王之罪人也。

五霸桓公爲盛。葵丘之會。諸侯束牲載書而不歃血。初命曰。誅不孝。無易樹子。無以妾爲妻。再命曰。尊賢育才。以彰有德。三命曰。敬老慈幼。無

忘賓旅。四命曰。士無世官。官事無攝。取士必得。
無專殺大夫。五命曰。無曲防。無遏糴。無有封而
不告。曰。凡我同盟之人。既盟之後。言歸于好。今
之諸侯。皆犯此五禁。故曰。今之諸侯。五霸之罪
人也。長君之惡。其罪小。逢君之惡。其罪大。今之
大夫。皆逢君之惡。故曰。今之大夫。今之諸侯之
罪人也。

此二節書言戰國諸侯大夫之罪也。孟子曰。
今之諸侯。所以爲五霸之罪人者。何也。五霸

之中。惟桓公爲最盛。其在葵丘之地。會合諸侯。威信足以服人。故但束縛其牲。載書於牲上。而不事殺牲以歆血。載書之辭有五。初命曰。孝爲倫行之首。不孝是子不子。罪在必誅。世子爲統緒所係。已立世子而復易。是父不父。無輕易。妻爲匹配所自定。妾而爲妻。何以嚴嫡庶之辨。無亂其分。再命曰。賢而脩行者。尊之。使隆其禮。才而擅能者。育之。使厚其祿。皆所以表彰有德也。三命曰。國人之老者待

以敬。幼者撫以慈。遠人之嘉賓。羈旅悉優遇之。無忽忘。四命曰。士恐未盡賢。但世祿而無世官。官事恐有廢闕。但耑任而無兼攝。取士必務得其人。不容苟取。大夫有罪。必告天子。而後殺。無得自專。五命曰。水泉之利。在共資。灌溉。無曲爲隄防。凶荒之災。在互相軫恤。無嚴爲閉糴。普天莫非王土。率土莫非王臣。無以私恩封國邑。而不告天子。五命既終。而又丁寧曰。凡我同盟之人。自今旣盟之後。恪遵

五命以歸於和好。若此者。無非申明天子之禁。而後世諸侯所當永守者也。今之諸侯。皆犯此五禁。向使在五霸之時。必爲五霸之所不赦。故曰。今之諸侯。五霸之罪人也。今之大夫。所以爲今之諸侯之罪人者何也。諸侯之賴有大夫者。以其陳善閉邪。而使毋喪失其德也。苟其君有惡。不能諫。而又承順之。乃長君之惡者也。是固有罪矣。然惡本在君。而彼特承順而長之。其罪猶小。至於君之惡未萌。

而先意迎導之。乃逢君之惡者也。君本無惡而彼迎導君意。引之於邪僻之地。以成其惡。非罪之大者乎。今之大夫。皆逢君之惡。以賊害其君。則諸侯干三王之法。犯五霸之禁。一自大夫有以逢之也。故曰。今之大夫。今之諸侯之罪人也。世道其愈趨而愈下矣。夫。蓋自古姦臣所由得君之心者。其始無不自逆揆君意以成其惡。而其繼遂至於君臣相暱而不可解。此爲君者所不可不察。而爲臣者所

不可不慎也。

魯欲使慎子爲將軍。孟子曰。不教民而用之。謂之殃民。殃民者。不容於堯舜之世。一戰勝齊。遂有南陽。然且不可。慎子勃然不悅曰。此則滑釐所不識也。曰。吾明告子。天子之地方千里。不千里。不足以待諸侯。諸侯之地方百里。不百里。不足以守宗廟之典籍。周公之封於魯。爲方百里也。地非不足。而儉於百里。太公之封於齊也。亦爲方百里也。地非不足也。而儉於百里。今魯方

百里者五。子以爲有王者作。則魯在所損乎。在所益乎。徒取諸彼以與此。然且仁者不爲。況於殺人以求之乎。君子之事君也。務引其君以當道。志於仁而已。

此一章書。見事君者當以正君爲要也。慎子魯臣。名滑釐。魯君欲使慎子爲將軍。統兵伐齊。以取南陽。孟子曰。勢必足以制敵而後取勝。故善用民者。必先教其民。若不教之禮義。而遽用之以卽戎。則民不知以尊君親上爲

心將必有敗亡之禍。是陷民於死地而謂之殃民。殃民者在堯舜行仁政之世。豈得而容之哉。甚矣用兵之不可苟也。且兵亦原有難恃者。果其負善戰之才。而一戰勝齊。遂立取南陽之地。揆之於理。猶且不可。況戰之未能必勝乎。慎子勃然不悅曰。戰期於勝。旣勝而取南陽。猶以爲不可。此則滑釐所不識也。孟子曰。其所以不可之故。蓋以先王固有定制也。吾明告子。在昔先王設都分國。天子之地

方千里。必千里而地之所出。始足待諸侯。苟
不千里。則無以供朝覲聘問之禮。而不足以
待諸侯。諸侯之地方百里。必百里而地之所
出。始足守宗廟之典籍。苟不百里。則無以充
祭祀會同之常數。而不足以守宗廟之典籍。
地制既定。是以當時封建諸侯。有以次而嗇
者。無過制而豐者。如魯之祖周公。功莫大焉。
其封於魯。爲方百里也。地非不足。而不踰於
百里。至如齊之祖太公。功不在周公下。其封

於齊也。亦爲方百里也。地非不足也。而不踰於百里。夫以周公太公之功。而分封不過百里。則其制之一定而無可加明矣。今魯方百里者有五。較之始封之地。其數已多。子以爲有王者起。而欲興復舊制。則魯在所損乎。在所益乎。吾知其必在所損。而何更取南陽以益之。是卽一無傷害。但徒手而取南陽。以與魯國。然且仁者不忍爲。况於戰鬪殺人。以求廣土地乎。夫亦濫原乎事君之義可也。大凡

君子之事君也。務引其君以當道。使事事循乎日用之常。而於道之中。務引其君以志於仁。使念念不忘乎公平之理。蓋君之志不爲嗜慾所誘。則其所行自無不悉合乎道。事君之大要盡於此矣。彼違制而非道。殘民而不仁。豈人臣所可以事其君者耶。由此知臣之於君。當慎所以引之。引之以堯舜。則爲堯舜。引之以桀紂。則爲桀紂。故善事君者。在絕其功利之私。而導以性情之正也。

孟子曰。今之事君者曰。我能爲君辟土地。充府庫。今之所謂良臣。古之所謂民賊也。君不鄉道。不志於仁。而求富之。是富桀也。我能爲君約與國。戰必克。今之所謂良臣。古之所謂民賊也。君不鄉道。不志於仁。而求爲之強戰。是輔桀也。由今之道。無變今之俗。雖與之天下。不能一朝居也。

此一章書。見爲君者當黜富強之臣也。孟子曰。臣之効力於君。與君之信任其臣。皆當以

正大爲務而不得徒徇乎功利之術。今之事君者。每自誇其能曰。我能爲君開辟土地。充實府庫。使國用饒足。今之所爲良臣者此矣。而不知聚斂民財。實古之所謂賊害其民者也。君立拂民從欲。趨鄉不在於道。而因以不志於仁。則與桀何異。乃不能引之志仁。而更求富之。是以貪濟暴而富桀也。非民賊而何。今之事君者。又自誇其能曰。我能爲君要約與國。攻戰必克。使國勢壯盛。今之所爲良臣。

者此矣。而不知喪棄民生。實古之所謂賊害其民者也。君方好大喜功。趨鄉不在於道。而因以不志於仁。則與桀何異。乃不能引之志仁。而更求爲之強戰。是以威助虐而輔桀也。非民賊而何。夫君以富強之臣爲良臣者。今之道。今之俗。然也。然亦思君之期於富強者。無非爲取天下計耳。若使率由乎今之道。無變易乎今之俗。日相尋於功利而不已。雖與之天下。而人心離散。叛亂立興。不能一朝居。

也。然則富強亦何益哉。蓋凡臣之務致於君。君之屬望於臣者。忠而已。戰國之君臣。莫不以富強爲忠。究之臣之所爲忠者。實非所以愛其君。而君之所謂忠者。實非所以教其臣。是故忠之一言。固不可以不辨也。

白圭曰。吾欲二十而取一。何如。孟子曰。子之道。貉道也。萬室之國。一人陶。則可乎。曰。不可。器不足用也。曰。夫貉五穀不生。惟黍生之。無城郭宮室宗廟祭祀之禮。無諸侯幣帛饗飧。無百官有

司。故二十取一而足也。今居中國。去人倫。無君
子。如之何其可也。陶以寡。且不可以爲國。况無
君子乎。欲輕之於堯舜之道者。大貉小貉也。欲
重之於堯舜之道者。大桀小桀也。

此一章書。見古聖人取民之制。不可以私意
爲重輕也。白圭名丹。周人。白圭問於孟子曰。
爲君者不取於民。則無以足君。而刻取於民。
則又無以足民。吾欲更立稅法。於二十分而
取其一分。何如。孟子曰。子所謂二十取一之

道乃居貉之地以治貉之道也。有如萬室之國。用器者多。而一人爲陶以制器。則可乎。孟子之意。蓋以君之取資於賦。猶國之取資於陶。陶不容過少。則賦不容過薄。故設此問也。白圭曰。不可。室多而陶少。器不足用也。圭旣明於陶之不可以一人。何獨闇於賦之不可以二十取一乎。孟子於是正告之曰。知此。則知貉道之非所以裕國矣。夫貉北方之國。高燥而寒。五穀不能生殖。惟黍早熟耐寒而生之。

是本無可爲納貢之物明矣。且其俗無城郭宮室。則無營築之費。無宗廟祭祀之禮。則無犧牲粢盛之費。無諸侯幣帛饗殮。則無朝會餽遺之費。無百官有司。則無廩祿之費。故二十取一而足也。今居中國。非貉之比。若使二十取一。無以盡君臣祭祀交際之禮。則去人倫。無以設百官有司之屬。則無君子。如之何其可以治也。彼陶以寡祗不足供萬室之用耳。且不可以爲國。况君子係輔治之人。無君

子而可以爲國乎。君子必不可無。則經費必不可闕。而二十取一。其何以足用哉。蓋自古十一而稅。乃堯舜不易之道。而不得更有輕重於其間也。較之堯舜之道而輕焉者。貉也。今欲輕之於堯舜之道者。將貉爲大貉。而我亦爲小貉也。較之堯舜之道而重焉者。桀也。今欲重之於堯舜之道者。將桀爲大桀。而我亦爲小桀也。重固失於貪暴。而輕不傷於苟簡耶。乃知圖治者以公平中正爲歸。偏輕偏

重。總無當於治道之大也。

白圭曰。丹之治水也。愈於禹。孟子曰。子過矣。禹之治水。水之道也。是故禹以四海爲壑。今吾子以鄰國爲壑。水逆行。謂之洚水。洚水者。洪水也。仁人之所惡也。吾子過矣。

此一章書。見治水當以禹爲法也。當時諸侯有小水。白圭爲之築隄壅水而注之它國。因對孟子而自誇其功曰。從來治水者莫如禹。然爲力則勞。爲時則久。若丹之治水也。非有

四乘之勞。八年之久。而成功爛焉。竊自謂愈於禹。孟子曰。子言愈禹過矣。禹之治水。順水之性。而得乎水之道者也。是故水之道無不就下。而就下則至海而止。禹之疏濬排決。一以放乎四海爲歸。是以四海爲受水之壑也。今吾子築隄壅水。但救己之患。而不恤鄰國之患。是以鄰國爲受水之壑也。不大異於禹乎。夫水可順不可逆。下流壅塞。則逆流而行。以至洚洞無涯。謂之洚水。洚水者。卽堯時之

洪水也。洪水爲災。下民昏墊。此仁人之所惡。而急欲拯其沉溺者也。今子不知通水之下流。以順其性。使鄰國共享其安。乃徒爲一時苟且之計。壅水以害人。其爲不仁。莫甚於此。吾子過矣。而何言愈於禹哉。蓋治水之事。視乎其心。禹之心爲天下。而公故其事足以利天下。白圭之心爲一國。而私故其事遂以病鄰國。公私之別。利害之關也。

孟子曰。君子不亮。惡乎執。

此一章書是孟子明信爲行事之本也。孟子曰。心能誠一爲亮。事有持守爲執。惟執而後事可成。惟亮而後事可執。君子之所以執而不渝者。由其亮而無僞也。若使觀理未明。是非難決。因而存心未實。意見多淆。本無必爲之志。安得有不_レ易之_レ搯。其於事也。必至游移莫定。而寡所執持矣。誠哉君子非亮無以爲執也。蓋君子自窮理之後。於凡事物之故。無不變而通之以成其亮。自無不變而通之以

成其執。彼執於一偏之見者。先已失其爲亮。
又安足以爲執哉。

魯欲使樂正子爲政。孟子曰。吾聞之喜而不寐。
公孫丑曰。樂正子強乎。曰。否。有知慮乎。曰。否。多
聞識乎。曰。否。然則奚爲喜而不寐。曰。其爲人也
好善。好善足乎。曰。好善優於天下。而况魯國乎。
夫苟好善。則四海之內。皆將輕千里而來告之
以善。夫苟不好善。則人將曰。訑訑。予旣已知之
矣。訑訑之聲音顏色。距人於千里之外。士止於

千里之外。則讒諂面諛之人至矣。與讒諂面諛之人居國。欲治可得乎。

此一章書見爲政者。在集衆善以成其善也。當時魯君知樂正子之賢。欲使執國政。孟子曰。樂正子見用於魯。道其得行矣。吾聞之喜而不能成寐。公孫丑問曰。士必有其才而後可任其事。樂正子強毅足以執持國政乎。孟子曰。否。公孫丑又問。有知慮足以圖謀國政乎。孟子曰。否。公孫丑又問。多聞博識足以通

達國政乎。孟子曰。否。公孫丑於是疑三者既
非所長。則何以居位而稱職。乃問曰。然則奚
爲喜而不寐。孟子曰。爲政之道。貴虛中以受
善。其爲人也。於凡善言善行。無不心誠好之。
此其所以喜也。公孫丑曰。好善遂足以治魯
國乎。孟子曰。善取諸己。則有盡。取諸人。則無
窮。以彼好善之心。雖治天下有餘裕。而况魯
國乎。是何也。凡言以心受。惟心能取者。斯言
畢子焉。夫苟好善。則舉四海之內。皆將輕干

里之遠而來告之以善。由是用天下之言。理一國之事。其何難之有。夫苟不好善。則人將曰彼之爲人。訑訑然自足其智。以爲予旣已知之矣。雖告之以善。其安聽乎。夫此訑訑之聲音顏色。人皆知其無好善之心。將風聲所播。裹足不前。而距絕善人於千里之外。士止於千里之外。則直諒多聞之士。遠而讒諂面諛之人。至矣。與讒諂面諛之人。居而所見所聞。無一善言善行。居身日以非。行事日以謬。

國欲治可得乎。甚矣好善優於天下而樂正
子之得爲政爲可浚喜也。凡爲政者能舍己
以來天下之善則善不必自己出而政無不
舉。否則自以爲智者適所以成愚。自以爲聖
者適所以成狂。書曰。能自得師者王。謂人莫
己若者亡。好問則裕。自用則小。君天下與相
天下者皆不可不知也。

陳子曰。古之君子何如則仕。孟子曰。所就三。所
去三。迎之致敬以有禮。言將行其言也。則就之。

禮貌未衰。言弗行也。則去之。其次雖未行其言也。迎之致敬以有禮。則就之。禮貌衰。則去之。其下朝不食。夕不食。饑餓不能出門戶。君聞之曰。吾大者不能行其道。又不能從其言也。使饑餓於我土地。吾恥之。周之亦可受也。免死而已矣。此一章書是明君子去就之義。以見仕之不苟也。陳臻問於孟子曰。君子處世。旣不可不仕以明高。亦不可苟且以倖進。古之君子。必何如而後仕乎。孟子曰。時之遭遇不同。君子

之自處亦異。其就而仕者有三。其去而不仕者亦有三。蓋君子之仕。非以干求利祿。志在行其道也。如爲人君者。有樂道忘勢之心。有尊賢圖治之意。屈己以迎之。內致其敬。外盡其禮。且虛懷信任。言我將納用其言。是吾道可行之機也。則就之。若外之禮貌雖存。而中之信任不篤。言旣不行。君子必不可以虛拘也。則去之。其次雖未能卽行其言。而接待之間。猶能內致其敬。外盡其禮。是亦尊賢敬士

之君可與有爲。亦吾道可行之機也。則就之。若禮貌寢衰。則好賢之誠已薄。君子當見幾而作矣。則去之。此皆委曲爲行道計也。其下有所遇困窮。君旣不能用。又不能禮。致使朝夕不食。饑餓不能出門戶。其君始聞而悔之。曰。賢者處於吾國。吾大者不能行。其致君澤民之道。復不能從。其因事納誨之言。使饑餓於我之土地。又不能盡養賢之禮。吾深以爲恥。於是供餽以周之。夫君之於民。亦有周給。

之義。茲更有悔過之言。受之而養其身。以有待。亦所以存吾道也。是亦就之之意。然所受有節。不過免死而已。豈濫受而苟畱哉。是亦去之之意也。古君子去就之義。大畧如此。蓋君子之遭遇。聽言爲行道之實。禮貌亦行道之機。故皆可委曲而就。爲人君者。必諫行言聽。而後爲好賢之誠。使人視禮貌爲去就。則已淺矣。

孟子曰。舜發於畎畝之中。傅說舉於版築之間。

膠鬲舉於魚鹽之中。管夷吾舉於士。孫叔敖舉於海。百里奚舉於市。故天將降大任於是人也。必先苦其心志。勞其筋骨。餓其體膚。空乏其身。行拂亂其所爲。所以動心忍性。曾益其所不能。人恒過。然後能改。困於心。衡於慮。而後作。徵於色。發於聲。而後喻。入則無法家拂士。出則無敵國外患者。國恒亡。然後知生於憂患而死於安樂也。

此一章書見聖賢皆成於憂患而安樂之不

可狃也。孟子曰。自古聖君賢臣。大約興於艱難困苦者爲多。如舜。聖帝也。發於畎畝之中。傳說。賢相也。高宗舉於版築之間。膠鬲。賢臣也。文王舉於魚鹽之中。管夷吾。齊之賢相也。囚於士官而桓公舉之。孫叔敖。楚之賢臣也。隱於海濱而莊王舉之。百里奚。秦之賢臣也。混於市塵而穆公舉之。是何其初則抑鬱頓挫。而後乃德業炳赫若此乎。是皆有天焉。非偶然也。天將以君相之大任。付於斯人。必先

苦其心志。使意不得舒。勞其筋骨。使身不得
息。餓其體膚。而飲食不充。空乏其身。而財用
不足。凡身之所行。與其意之所欲爲。相爲拂
亂。而逆其志願。凡此者。皆所以竦動其理義
之心。使之惕然自奮。堅忍其嗜欲之性。使之
澹然無求。且閱歷艱難。擴充識見。才力之所
不能者。使增益之。所以智深勇沉。才全德備。
一旦可以當大任而無難也。此不獨聖賢爲
然。凡中人之資。每因有過失。然後翻然改悔。

蓋不能謹始於平日。必待事勢窮迫。困於心而不得通。衡於慮而不得順。然後感奮而興起。不能燭理於幾微。必待過失顯著。驗於人之色。發於人之聲。然後警醒而通曉。此又不獨人情爲然。凡有國家者。內無法度之世臣。諫諍之賢士。則無以聞其過。而易至於怠荒。外無強大之敵國。侵凌之外患。則無以惕其心。而易至於驕縱。國鮮有不亡者。由此觀之。可見憂患者。人以爲可危。而不知爲增益德。

性之具安樂者。人以爲可恃。而不知爲漸至危亡之階也。人安可惡憂患而耽安樂也哉。蓋用人者將投之以宏鉅。必先擇之於艱難。湯之所以立賢無方也。守國者慮憂患則常安。徂安樂則常危。益之所以儆戒無虞也。孟子此言。何其明切而警凜與。

孟子曰。教亦多術矣。予不屑之教誨也者。是亦教誨之而已矣。

此一章書是孟子欲人思教者之心也。孟子

曰。人之材質不同。君子之施教亦異。故教亦多方矣。予於人之有不善者。習染既深。拒絕之而不屑教誨者。亦有之。然我之心。無非使之惕然悔悟。改惡遷善。非忍而絕之。實激而進之。是亦教誨之而已矣。人可不以教者之心爲心乎。蓋聖賢大道爲公。視天下無棄才。曲成而不遺。抑揚進退。無非教也。帝王之黜陟予奪。推之以至於刑罰流就。無非使天下嚮善而已矣。故曰。刑以弼教也。

日講四書解義卷之二十四

五
三
十
三
日
家
族
宗
譜
四
卷
五

